

# OLIYALA WA MUROOHONI



Vano kinnaamini, vano kinnaamini,  
Sothene sinniweryaneya, vano kinnaamini;  
Vano kinnaamini, vano kinnaamini,  
Sothene sinniweryaneya, vano kinnaamini.

<sup>2</sup> Nikhale neemenleene okathi vakhani paahi vano mwaha wa Masu a Apwiya. Nrowe nimukhunle Amosi, profeta Amosi, ekapiitulu 3, opacerya eversiiikulu 1.

<sup>3</sup> Kintthuna kimuxukhuru Munna muthiyana Juanita ni Anna Jeanne ni Munna Moore muthiyana, mwaha wa isipo iye sa ikooru soophenteya. Eyo yookihokoloxa, kikilaanthe-ene vale kiiwaka. Miyo kaamuupuwela, okathi awo yaaryaaya ni hiyo, yiipaka mukampaanyani, Munna Jack ni miyo naamulavulaka, axiruusi ale yaari axiruusi axikhaani, a muloko ni thanu na mosa, etthu ntoko siiso, mwaaruusi. Vano, kinoona wira, Munna Anna Jeanne ookhalana aana athanu, ni Munna Juanita orina— orina. . . mai a aana anli. Ni hiyo vekeekhai nri vakhiviruxa wo wiila weiwo, athiyana, ovikana saaryaahu okathi ule, mwa miyaakha soophiyaka muloko ni mithanu na mosa voohiyana. Khenrowa opisa, ninrowa olapuwaka, okathi yoowo woovuwa.

<sup>4</sup> Vano mwa Amosi kapiitulu 3, nrowe nisome.

*Mwiiwe masu ala APWIYA alavunlyaaya  
yoovirikanyakani nyuwo, O aana a Isarayeli,  
yaavirikanyaka atthu othene Miyo kaakuminhe aka . . .  
wEjitu, yiiraka,*

*Nyuwo paahi koosuwenlyaakani . . . itthoko sothene sa  
elapo ya vathi: tivo miyo kinimoohukhumuni mwaha  
wa . . . sootakhala sanyu.*

*Anneetta aili vamosa, ehiiwananaka?*

*Mwatto onniipa mutakhwani, ahiphwannye  
yookhuura? mwatto mukhaani onninla mukhukuni  
mwawe owo ahivanre etthu?*

*Onniheiwa mwaapalame khumorela vathi, ohireiwe-  
vo muraakho? muraakho onnikwasuwa vathi,  
ehivariwe etthu vaavo?*

*Ninnoompwa nlope mpooma, atthu kuhuova?  
ennikhala ehasara mmuttettheni, APWIYA ehirumme?*

*Tthiri Apwiya . . . khaniira etthu, ehipacenrye  
owooniherya isiiri saya arumeyi aya maprofeta.*

*Mwatto iipaka, taani ohinoova? Apwiya . . . aalavula,  
taani ani ehilaleye?*

Nuuramihe muru.

<sup>5</sup> Pwiya Yesu, Masu Anyu, ala, Pwiya, nikhalane opatthana ohiy'ula mwa epannte yeela. Hiyo ninvekela, Pwiya, wira Nyuwo munivahe yoohimya ya yoosoma, wira hiyo nikuxe okhuma va, ni wira eyo yooruuheleni nttittimiho Nyuwo. Munireerihe okathi onoowehereryaahuni, Pwiya, ohiy'ula, mwa Masu Anyu. Mwaavonihe aretta n'ale ooxanka. Nwoopole ale oorimeela. Mwaavahe ikuru ale ootteettheya, Pwiya, antteettheya, mwerutthuni ni muroohoni. Ni munivahe omwaraxiwa wuulupale wa Mukhalelo Anyu, maana hiyo ninvekela mwa Nsina na Yesu. Amen.

<sup>6</sup> Kintthuna kikuxe wa yoosoma, mwa yeela, ohiy'ula: *Oliyala Wa Muroohoni*.

<sup>7</sup> Muhiliyale, meelo, ti waavekelela aretta meelo. Ninnirromela wira Apwiya animwiira itthu suulupale, meelo oxekuwa okathi wa iwoora piili, vaavo hiyo...okathi ompacery'ahu miteko sahu s'okokhorela. Mmiravo onookhala vaava wira okawe ittikitti sa mavekelo. Ni atthu othene anoovekeleliwa ale antthuna ovekeleliwa. Ni ninniwehererya okathi wooreera, meelo, mw'Apwiya.

<sup>8</sup> Vano nyuwo atthu muri va, munixekuryaka muhikhanle a opooma. Muupuwele, sookhala ikereja sooreera, sa Ehapari yooreera yoomalela mpooma mothene. Mwa oorwa saana mwa sothene iyo.

<sup>9</sup> Miyo kaalavula ni mmosa wa mapastore aka muxirikha, vate, onovolowaru, Munna Jackson, khalayi a ekereja Metotista, ohitto epooma emosa wala piili ohitto wahu.

<sup>10</sup> Ni akavi ari va akhanle oosonkhana ni etapernakulu, rowe noone matata anyu, mapuro othene. Wulu, kookupali—vekeekhai kootteeliwa murima okhala ni nyuwo. Ola muthukumano wookhuveelaxa oIndiana kirinaaka mwa okathi munci-ene. Kinuupuwela otthika, vahilekenle, ni ohela eheema ni okhalana Malope ale mathanu na maili ookiserya, Apwiya yatthuna vale.

<sup>11</sup> Tivo, vano, masi muupuwele meelo. Muhiliyale, meelo iwoora piili. Nto, vano, muteko ahu ontharelana onrowa opacerya esumana enrwa, oTampa, Florida.

<sup>12</sup> Vano kintthuna kilavule mwaha wa: *Oliy-...Oliyala Wa Muroohoni*.

<sup>13</sup> Vano, mwaapar'ola mwaamukhaani hiyo onimuhimyaahu, Amosi, okathi vakhani paahi, wira niphwanye mulipiheryo ahu nihinatthi ophiyerya yoosoma. Ola waari okathi wa oraala wuulupale oSamariya. Isarayeli aahiraala. Awo vekeekhai yaarootthara olumwenku ni yaarooraaala.

<sup>14</sup> Kahi wira okathi wothene oraala ethoonyeryo ya iparakha sa muroohoni, masi imaara sikina ti voovirikana. Atthu anuupuwela wira khino nyuwo muhaana okhalana mireerelo sinci-ene sa molumwenkuni, ni eyo enooniherya wira Muluku

onimooreerihani. Eyo kehiyo ekeekhai. Imaara sikina ti yoovirikana.

<sup>15</sup> Masi hiyo ninnimphwanya, owo, hiyo khaninsuwelaxa sa mwamulopwana ola. Owo, hiyo khanirina wahala, otthu owo aakhummy'awe-wo. Hiyo ninsuwela wira owo, voolikana ni Yolempwa va, owo aari namasukiha imompe, masi Muluku khunvenxa.

<sup>16</sup> Kinniwerya otthokelela woona, nihiku nimosa nooviha oSamariya wu, emosa wa ipooma suulupalexa sa oturista sa molumwenkuni nihiku nle. Yaari etthu sa ntoko, niireke, oMiami, wala—wala Hollywood, Los Angeles, mapuro kamosa-kamosa awo siiso, nipuro nimosa nuulupale na maturista. Ni hiyo ninoowerya otthokelela omoona owo. Owo khaatonko okhala epooma ntoko ele. Masi, owo aahikhalana Masu a Apwiya, owo aarwa epooma ela yuulupale weiwo etampi yaasanryaaya khula epantte. Arumeyi othene yaahikhuma mwa Masu a Muluku, ni khiyaarina profeta mwa miyaakha sinci-ene.

<sup>17</sup> Nto siiso mwamulopwan'ola, vaphiyalyaawe vasulu va ntumuxa, onkela ephoyo wa oSamariya vakhani, kinniwerya otthokelela omoona owo, nsuwa nooviha naaryaka, ni ireru sawe soottweelela owiitho wawe, ni maitho awe makhaani oophunyeya, ni muru awe mwaamukhaani, wa ntari waaryaka, okathi waawehaawe epooma ele. Ni maitho awe oophunyeya. Owo khaaweha ele maturista anoonaaya kweekwe, orowa epooma emosa ni woona oreera waya w'okuxa murima. Owo aarooweha khoona yoonelo xeeni epooma ele yaakhanlyaya, epooma emosa yaatonko okhala muttette wa Muluku, ni yaaphiyenrye omora elakeyelo siisaale. Khivanxankiha . . .

<sup>18</sup> Mwamulopwan'ola, oohisuweliwa aari profeta Amosi. Nto vano hiyo khaninsuwelaxa sinci-ene sa yoowo. Hiyo khaninsuwela nipuro owo aakhummyaawe-wo. Maprofa imaara sinci-ene annirwa vanlakani, oohisuweliwa, ni ankhuma enamuna emosaru. Hiyo khanisuwenle otthu awo ankhumasaaya-wo, otthu anrowaaya, khaninsuwela sa khalayi saya. Muluku onimwaavenxa paahi. Khiyaakhanle sinci-ene so oweha mwa yoowo, masi owo aahikhalana SIISO ANIHIMYA T'APWIYA. Eyo t'itthu yuulupalexa miyo kinoonaaka. Vekeekhai, owo aahirwa oSamariya wira opacerye ekampaanya awe. Kookupali wira owo khaarina hata mukhaliheryo wa mutthu. Owo khaarina hata ettikitti ya opathana ya hata muromolelo. Owo khaarina hata ipaphelo sa onamurummwa wira ooniherye nikhuru xeeni owo aakhummyaawe-wo. Ni, masi, owo aahikhalana etthu emosa, owo aarina Masu a Apwiya wa muttette ole.

<sup>19</sup> Ni miyo kinniikoha, vakhala wira naamuwerya omukuxa Amosi, olelo, omuruuha okathi ahu, kinniikoha khama aamukhala oowaakheliwa saana mpooma mwahu olelo.

kinniikoha khama hiyo naammmwaakhela, wala naarowa wira siiso ntoko awo saairalyaaya. Hiyo ninniphwanya ipooma sahu mwa emorelo emosaru. Ni ninniphwanya wira etampi ti yuulupale eriyari y'atthu, ntoko saary'aya okathi ule. Ni kinniikoha, vakhala wira mwamulopwan'ola, oohisuweliwa, onrowa opacerya sayi ekampaanya ela? Moota, owo onrowa opacerya vayi? Ekereja xeeni owo onrowaawe-wo, wala t'ani onrowa wiiraana ni yoowo? Owo khaarina etthu yo wooniherya nipuro xeeni aakhumyaawe-wo, owo khaarina etthu nnakhala woohikhala SIISO ANIHIMYA T'APWIYA mwaha wa epooma ele.

<sup>20</sup> Owo aaphwannye awo oomoraxa ni oohononeya vari olakeya, waari okathi muulupale. Athiyana epooma ele yaahipherya okhala ntoko siryaaya Estadu Unidu. Awo yaahikhala oohononeya. Ithtu sothene Muluku aaweherenryaawe wa yaawo, awo yaatthara ephiro ekina. Ni—ni ninniphwanya wira naari nipuro nuulupale vaavo awo yaarinasaaya soowiina mphironi, athiyana voohifayi erulaka ikuwo saya, ni siiso, ntoko streaptease. Vekeekhai, eyo yaari etthekulelo v'atthuni mahiku ale, vano ti ya khula nihiku. Muhiye okathi okhale wooviha, ni khivantthuneya orowa hata etthekulelo. Awo arisa mphironi, nipuro pi nipuro, khula enamuna. Wuuliha muru nyuwo athiyana, wira etthu siiso! Khamunuuliwa muru mmansinyu?

<sup>21</sup> Vano nto—vano nto miyo kaahimuleela eyo muthiyana mmosa nno, kahi khalayi, nto owo khwira, “Vano,” owo khwira, “Munna Branham,” khwira, “eyo, eyo ti—eyo ti siiso athiyana othene.”

<sup>22</sup> Miyo khwira, “Masi khivantthuneya hiyo wira ntoko atthu akina. Hiyo noovirikana. Hiyo na mu—mukhalelo woovirikana.”

<sup>23</sup> Enikuupuxerya muthiyana mmosa, iirale, “Ahe, Munna Branham,” mukina khwira, “Miyo—miyo—miyo nkinaawara akaputtula ale.” Khwira, “Miyo kinwara ikalsa.”

<sup>24</sup> Miyo khwira, “Iyo sootepa.” Uh! “Muluku ohimnye wira, ‘Ti yoonanara,’ vamaithoni Vawe, ‘muthiyana owara ekuwo eri ya mulopwana.’” Eyo ekeekhaii voolikana.

Mmosa khwira, “Ahe, khasimpakiwa ikuwo sikina.”

“Awo nlelo annipaka maakina oottottha ni aakhalana ikuwo sootthanvwa.”

<sup>25</sup> Khanivo ntthyawelo. Ti ele paahi eri mmurimani. Ti yeeyo enooniherya. Eyo—eyo enimwiisuwanyeiha mmansaya.

<sup>26</sup> Nto vano hiyo ninnoona wira, muttethe ola, waahikhala woomora elakeyelo. Alaleyi yaanoova ohimya etthu sa yoowo. Nto, masi awo yaahikhalana, mwammirav'ola mwaamukhaani aarwiye vamwaako, aarwa waaleela SIISO ANIHIMYA T'APWIYA, “Mukukutthe etthu ila, ahiiso

munoorowa mwepothhani.” Ni owo aahikhala wira oone mahiku oomaliheriwa elaleeryo awe. Owo aahilaleerya mahiku a Yerobowamu a Nenli, yoowo aari ookhoottiwa, mwa khula enamuna; owo—owo aacalenle ilapo sikina. Nto—nto Amosi ula mwaamukhani aahilaleerya khwaahimeerya, owo khwira, “Muluku yoowo munihimyaanyu omurumeela, Yoowo onimooopwetexani.” Ni Owo aahiira.

<sup>27</sup> Ni vaakhanle wira nsu nawe naamukhala va ohiy’ula, mu . . . oBirmingham, naamuhimeerya etthu emosaru yeeyo ikereja. “Muluku yoowo munihimyaanyu wira munnimurumeela, onimooopwetexani nihiku nlo.” Miyo nkinilavula ni muthukumano ola va. Ifiita iya sinrowa mulaponi mothene. Vano, muupuwele, eyo ekeekhaii.

<sup>28</sup> Vano owo khusuwela wira, okathi owo okenlyaawe mmuttettheni, wira owo . . . itthu sothene iya, kinniikoha moota owo aakhanlyaawe woonaka oweha ni wona emorelo ya atthu a Muluku, yaawo aaveleelihiwaawe-wo.

<sup>29</sup> Kinniikoha vakhala wira hiyo naammwaakhela yoowo vano? Vaakhanle wira owo aamoowa, hiyo—hiyo naamwiiraana ni yoowo? Naamunvaha yawihu—yooreera ahu? Naamunvaha ocaliwa wahu? Naamurukunxa murima aanihimenrye wira naahaana otthikela Masu a Apwiya ni wira ntoko Apwiya ahimalyaaya wira niire?

<sup>30</sup> Kinniikoha etthu axinn’ihu athiyana yaarowaaya wira mwaha wa maihi aya oometthiwa? Yaamuhiya maihi aya wunnuwa-tho, vaakhanle wira Amosi aamurwa? Owo aamulaleya, ni miyo kinooleelani yeeyo, okhala wira awo Masu a Apwiya.

<sup>31</sup> Ki—kinniikoha khama awihu—makhuru ahu anaathanla matiyaakono, athenle vaara vararu wala vaxexe, ni—ni sikina siiso, ni ophavela okhala matiyaakono, kinniikoha khama itthu iya sothene, kinniikoha etthu aarowaawe omwiiriha mulopwana aarowa waahiya amwaar’awe waawara akaputtula n’ukhumela mphironi iwo, n’uthikila malaxi, vaniyateni, alopwana eviraka? Kinniikoha etthu aarowaawe omuhimeerya mulopwana siiso?

<sup>32</sup> Owo vekeekhai aamupwapwela yeeyo ni sothene saari mwa yoowo, maana owo aarina SIISO ANIHIMYA T’APWIYA, ni owo khaakhanle wiiraka etthu ekina woohikhala yeeyo. Owo aaphwannye awo nihiku nle ni mwaha wootepa wa eretta, oliyala wa muroohoni, ni eyo vekeekhai t’erinaahu olelo.

<sup>33</sup> Vano, owo aasuwenle sayi etthu yaarowa okhumelela? Amosi aarowa osuwela sayi? Yoopacerya, owo aari profeta. Ni, etthu yootharelana, aahisuwela ni eretta ele yaari yoomwaleya, ni ti siiso aasuwenlyaawe iye saari sookhumela.

<sup>34</sup> Meetiku amwaleya vale eretta khoona wira mutakhali uwo ohiithipela, onnisuwela wira khiyaavo etthu enihala woohikhala

okhwa. Ti yeeyo tu, voohikhala wira Muluku onimwiira etthu ya yeeyo.

<sup>35</sup> Ahe, mwaawehaka epooma, ni waaweha atthu, oweha ekereja, ni waaweha atthu ari ottaiwenexa wa Muluku, khiyaavo etthu ekina yo omwaleya woohikhala, “Etampi! ‘Ni nlevelo na etampi okhwa.’ Onkhala okhwa.” Emwaleyelo ennooniherya ele ekhanle. Moone, atthu yakhalaru ottaiwene wa Muluku ni khuhinaiwelela Masu, khuhinatthuna-tho Masu, vano eri emwaleyelo emosa ya yeeyo, “‘Munepa onttheke, munepa owo onimookhwa.’ Ohaamini onimoovalaaniani ni Muluku.” Eyo ekeekhahi volikana.

<sup>36</sup> Wira, owo aahisuwela ele yaari eretta, iye saari ikhumelo, okathi woonalyaawe eretta ya—ya etampi mpooma.

<sup>37</sup> Vano, oliyala nno, nnihimeeriwa wira e—e—e... onniwiirihani ophiyerya mukhalelo muhinweryaanyu wiisuwanyeiha mmansinyu. Vano, eyo etthu yoohilimaleleya. Kheniiraneya imaara sinci-ene, masi ontannyiwa ni othanana. Ti mutthu hata ohinsuwela wira taani. Omphwanyaneya imaara sikina, mukhottoni, anatoropa onnaaphwanya. Imaara sikina atthu onnaaphwanya. Etthu ekina entannya, onkhala oxanka. Oxanka onootannya.

<sup>38</sup> Oxanka khorina ikuru mwa yoowo, nnakhala. Ayo, paahi—paahi—muhixikhe oxanka, mukupali waamini.

<sup>39</sup> Ookhala mutthu iirale, “Ahe, vano, anchi nyuwo mwaarowa woopeliwa voosiisu, khamwaarowa oxanka?”

Miyo khwira, “Nnari, kinoona wira nnari.”

“Mwaha wa xeeni?”

Miyo khwira, “Oxanka khiwaawerya wira etthu woohikhala okitepiha.”

“Ahe, onrowa ophwanyiha—ni waamini?”

Miyo khwira, “Owo pooti okivuluxa.” Vano eyo ekeekhahi, moone.

<sup>40</sup> Tivo oxanka khorina ikuru mwa yoowo, nnakhala, masi waamini wookhalana ikuru sothene. Mwaamini!

Vano oxanka imaara sikina onnitannya.

<sup>41</sup> Ni etthu ekina enitannya eyo eriyari ya atthu, okhalana miyupuwelo miili. Eyo enootannya oliyala. Enophiihani nipuro nyuwo—nyuwo, vekeekhai, etthu mwiiralyaanyu, ohoopweteyani otthokelela wanyu. Nyuwo moohiya muupuwelo anyu. Khamunwerya wira... Nyuwo khamunsuwela mw’ani. Nyuwo khamunwerya wiisuwanyeiha mmansinyu. Nyuwo munoowerya weetta, olya ni sothene, masi, nyuwo, nlelo khamunwerya wiisuwanyeiha mmansinyu. Nyuwo mookhalana osoma wanyu w’oxikola, munniwerya... osoma

omosaru mwaarinaanyu, masi khamunsuwela onkhumaaya, khamunsuwela mw'ani, mwa vayi. Iwo oliyala, ninleeliwa siiso.

<sup>42</sup> Hiyo ninnisuwanyeihiwa ni amusi ahu, mwa ekumi ila ya omutthu, mwaha wo othela. Vano n'axaar'ihu, hiyo ninthelanaahu, ni emusi ahu ensuwanyeihiwa ni ophitaana wa wawihu—wawihu—othelana wahu. Vano nto, wuupuwela, ankhi etthu ila yootakhala yookhumelenleni ni muhinawerya wuupuwela taani mmuthenle-anyu, taani okhanle mwaar'inyu, ale akhanle an'inyu, taani akhanle atithi anyu ni ame anyu, taani okhanle namwaattamanani anyu? Eyo yaamukhala e—etthu yootakhala.

<sup>43</sup> Vano hiyo ninnisuwanyeihiwa, emaara ekina, ninniwerya wiisuwanyeiha mmansihu munlokoni mw'atthu, mwaha wo okhalana akhili ni—ni okhala oovirikana ni ekumi y'axinama. Mwaamunama khonwerya wuupuwela, owo oniiseetiha ni irumelo paahi. Owo khorina munepa. Ni, masi, hiyo na ekumi ya mwaamunama. Etthu ennikhaliha oovirikana. . . Hiyo na anamwaamwa, masi etthu. . . Namwaamwa owo mwaaxinama a ephome yooviha, ni hiyo niri mwa mukhalelo wa mwaamunama. Masi etthu ennikhaliha oovirikana, hiyo ninsuwanyeihiwa mwaha wo okhalana munepa, muupuwelo onnihimeerya etthu eri yooeera ni yootakhala.

<sup>44</sup> Vano wookhala okathi, mwaphwanyaru oliyala nno, mwaakhanlyaanyu ophieryaka ntoko Npukutonosori, waaryaaya, yoowo aaitottopenle mmansawe emaara emosa, nto Muluku khumwaaminiha wira aari mwaamunama. Vano owo aakhala mothakoni ni—ni aalya malaxi ntoko enyompe. Ni—ni awawe—manri awe khunnuwa khukhuneela erutthu awe, ntoko mapururu a xawawe, ni aahikhala murima wa nxeni mwa yoowo. Munnona? Iwo waari oliyala, okhala wira aarooliyala wira aari mwene. Owo aahiliyala wira aari mutthu. Ni uupuwela wira aari mwaamunama, tivo owo aairaawe ntoko mwaamunama, okhala wira aarooliyala wira aari mutthu.

<sup>45</sup> Ti yookhweyaxa, olelo. Ni hiyo ninniliyala, imaara sikina, ele ekhanle Ekereja y'eKristu. Hiyo niniira ntoko olumwenku. Eyo enooniherya wira niroophwanya oliyala wa muroohoni, okhala wira khamuniira ntoko aKristu. Muniira ntoko olumwenku. Nyuwo munaakhela murima wa molumwenkuni, ni eyo enitannya yeela.

<sup>46</sup> Va hiyo—hiyo ninniphwanya wira Isarayeli aahikumiherya, aahiikumiherya molumwenkuni, ni aahimorela vamutharini va. Nto profeta ola aahiveleelihiwa wira aathipule-vo, aawenrye-ru, ni waalopola. Muluku, ni mahala Awe, aamuthanlale Isarayeli varyari va maloko othene makina mulaponi. Mahala yaahiira eyo. Owo aahaavaha mittetthe soothanla. Owo aavanhe mampa awo yahaarinaaya ooteka. Muluku aahiira eyo, aarimwaathanla. Owo aahaavaha imatta awo yahaatonko aya othuma. Owo—

Owo aahaavaha, Owo aahaavaha yoolya yahaatonko aya waala. Aahaavaha ihimye yahaatonko aya othipa. Aahaavaha oxintta yahaatonko aya ophwanya. Owo aahaavaha mahala awo yahaatonko aya ophwanelela. Muluku airale eyo ni mahala Awe w'atthu ala, Isarayeli, oothanliwa Awe, oophentiwa Awe.

<sup>47</sup> Ni Owo oohimya, mBibiliani, "Owo aaphwannye vapuwani, ntoko mwanamwane mwamuthiyana aakilaanthe mphomeni mwawe yoowo, vano Owo khimurapiha khumukukuttha, ni etthu Owo oiralyaawe. Masi Muluku vamanlyaawe omooniherya omoriwa ikharari nno wothene, nto owo khuthaaciri," owo aahiphwanya oliyala, oliyala, "ni aahiliyala voomalela nipuro itthu iya saakhumme-aya."

<sup>48</sup> Kinoona wira eyo elatarato ya Amerika, 1964. Enwereiwa eretta emosaru. Hiyo na ikereja suulupale soowerya. Hiyo n'atthu aalupale, ni oowerya. Hiyo nri imilyawu sene mwa eyaattelo, ni ninniliyala vatthu itthu iya sikhummyaaya.

<sup>49</sup> Awo yaarina mwaha wootepa wa yeeyo. Numala Muluku owiirela yooreera, ni waakumiha ilapo sothene sa apakawu, khwaakhaliha atthu oovalaanihiwa, aavalaaninhe awe khwaaruuha wa Yoowo. Owo iirale, "Okunxe mwiri wa elapo ekina khuphatteya elapo ekina, ni moota Owo orehenryaawe wira wiimeke mihokorokho ni okhala wooruwerya, masi mwiri khuliyala vakhumme iparakha saya."

<sup>50</sup> Siiso t'aryaaya atthu a Muluku, mahiku ala ookiserya, aaliyala ele enihimya onamoona wo okhala muKristu. Eyo yoothika, oliyala nno ohaaphwanya atthu. Awo khanwerya wiisuwaneiha mmansaya.

<sup>51</sup> Awo, awo aaliyala Eyo voomalela. Awo yaahiliyala waarya Wawe. Awo yaahiliyala ikano Sawe. Athiyana yaakhala ntoko athiyana akina.

<sup>52</sup> Ekereja ya Muluku ni atthu Awe kweekwe ankhalaka, "Atthu oovalaanihiwa, ni—atthu oowiihaneliwa, ota atthu oomeekha, nloko noowaarya, onamukuttho w'omwene; aninvaha mikuttho sa erooho Muluku, mihokorokho sa iyano saya, sintottopela Nsina Nawe." Muluku oihanne Ekereja Awe khuvalaaniha Eyo ni olumwenkuni, mwaha wa niwoko nenlo. Vano Owo oovaha ekano, ni Owo, Eyo, ehaana okhala yoowaarya. Owo oirale, "Miyoka oowaarya, ni nyuwo muhaana okhala oowaarya, ni woohikhala oowaarya khaavo onrowa owoona Apwiya." Muluku oohimya eyo, Mwaneeene.

<sup>53</sup> Ni Owo aahiwiiana atthu ala wira ekhale enamuna yeela y'atthu, masi awo yaahiliyala eyo. Awo yaahiliyala ikano Sawe, ni yaahiliyala olakeya waya. Athiyana mphironi, athiyana aIsarayeli iwe, khula mmosa owehereryaka o—orupala ya Erooho Yoowaarya, wira amuyare Mesiya, vano nto yiiraka siiso. Mukhalelo aya wa murima waari woonanara.



54 Kintthuna keemele vaava minuutu mmosa, kihimye wira eyo etthu emosaru eriyari y'atthu ahu, olelo, aniisihana aKristu. Mukhalelo aya wa murima, vaakhanle wira yaanisuwela paahi!

55 Emaara emosa, oKuusini. Miyo koosoma ehantisi emosa ya ipantte iya nno, weiwo awo yaakhalanakaaya ipottha. Awo yaamwaakuxa atthu awo ni waatumiha opasari, ntoko mwaarowaanyu wiiraha ekaaro yettaniwe. Vano nto aahikhala namathuma mmosa, namatumiha-tho, aavira n'ukuxa ipottha iya ni omweetta nakoso, ntoko mwaarowaanyu wiiraha ekaaro wala etthu.

56 Nto ipottha iye saari ottaiwene wa elapo aya. Iyo saari sa wAfrika. aBoer yaarimwaavarasa, khwaaruhasa nno mukisironi, nuumala khwaatumiha muEstadu Unidu khwaatumiha ntoko ipottha, okhuma oJamaika ni mapuro makina.

57 Vano ninniphwanya wira atthu ale yaari ooriipiwa murima. Awo yaaroovariwa owannyaya. Awo yaahikuxiwa ni nwanani, ni yaahiriipiwa murima. Awo khayaakhalakhala ewoonaka-tho aiy'aya, wala amwaar'aya tho, atithi aya n'amey'aya, ana aya. Awo yaari mara. . . Yaahaana waamana, ni mweepettho, wira yaavariheke muteko, okhala wira awo yaari atthu ooriipiwa murima.

58 Nto nihiku nimosa, mutthu mmosa namathuma ni otumiha khuvira ekaafirika emosa, owo khoona nikhuru na ipottha nivaraka muteko vale. Nto owo—owo khuvolowa khimukoha mwaneene, khwira, "Ipottha kavi murinaanyu?"

Khwira, "Soophiyaka emiya."

Khwira, "Mookhalana muntthunaanyu waakakhanya wala otumiha?"

Owo khwira, "Ayo."

Khwira, "Mukihye kaawehawehe."

59 Vano owo khurwa vapuwani khwaaweha, nto owo khoona wira yaahaana weetthiwa emaniwaka. Nto nuuvira okathi vakhani, owo aahimoonaa mmiravo mmosa vahaathuneya awo ommana. Owo aarovenxa ethhirima awe ni ereru awe; khiyaarina ommanaka. Vano namathuma ni otumiha khwira, "Kaatthuna kithume epottha ele."

Nto owo khwira, "Masi ele khentumihiwa."

60 Owo khwira, "Ahe, evirikanelo xeeni ya epottha ele?" Khwira, "Epottha ele ti mukhulupale a iye sikina?"

Owo khwira, "Nnari, ele epotthaa paahi."

Owo khwira, "Ahe, khino nyuwo munoomulyiha voovirikana."

Owo khwira, "Nnari, owo onlya onaapeiwa ntoko ipottha sikina."

61 Owo khwira, “Ahe, exeeni enimukhalihaxa oovirikana ni ipottha sikina?”

62 Owo khwira, “Ahe, ela miyo kinniikohaka, nave, okathi munci-ene. Masi nihiku nimoso kisuwela, wira, elapo weiwo owo okhummyaawe-wo, atithi awe amwene a nihimo nothene. Ni onaamwi okhanle-ene mmalapo, ni oorakamela owannyawe, nlelo onnisuwela wira mwaana a mwene, ni owo—owo oniiseettiha ntoko mwaana a mwene.”

63 Miyo khuupuwela, “Masi, eyo, vakhala wira Nooriipe onkhuma wAfrika, ni aanisuwela wira atithi awe yaari mutthu a nihimo ni mwene a nihimo, eyo yaarowa omwiriha exeeni muKristu oyariwe vasya, mulopwana wala muthiyana, wira Atith’ihu ti Mwene a Wirimu Moovuwani!” Hiyo naahaana wiiseettiha ntoko alopwana ni athiyana aKristu. Hiyo naahaana wira siiso, owara siiso, olavula siiso, okhala ntoko siiso. Hata nikhalaka amalapo, nlelo n’ana a Mwene. Amen.

64 Mukhalelo ahu wa murima, ohiya wahu olakeya mahiku ankhalaaahu vano! Isarayeli aahimorela mw’etthunelo yeeyo ni aari oohureya nave. Awo yaarooliyala ikano sa Muluku, “Muhiraruwe, muhimukhalele nrima mwaara a mukhw’inyu,” ni siiso. Awo yaahiliyala ikano iyo. Awo—awo—awo khayaatthunatho iyo. Ni awo—awo yaatthuna o—okhala ntoko olumwenku mukina, siiso ntoko ekereja ekhanlyaaya olelo.

65 Emaara emosa, Isarayeli, okathi awo apacenryaaya, yaatthunne okhalana mwene aarumaka. Samuweli aahaaleela, profeta yaaveleeliheriwaaya, owo iirale, “Vano kootoko wooleelani etthu p’itthu mwa Nsina n’Apwiya yahaatonko wiiraneya?”

Awo khwira, “Nnari, nyuwo khimunatoko.”

66 “Miyo kootoko woovekelani yoolya ni musurukhu, musurukhu anyu, nave, wira miyo kilyeeke?”

67 “Nnari, nyuwo khimunatoko wira eyo. Nyuwo khimunatoko onileela etthu, Samuweli, ehinatoko wiiraneya. Ni nyuwo khimunatoko onivekela musurukhu ahu, wira mulyeeke. Masi, nnakhala vo, nimmutthuna mwene, khula enamuna.”

68 Muluku khimuleela Samuweli, “Mwaahiye ekhalane. Awo Khayookhoonteni nyuwo; akikhoontte Miyo.”

69 Isarayeli aahiphiyerya mukhalelo yoowo vano. Awo khayaatthuna-tho maprofa a Muluku. Awo khayaatthunasa. Nto mmosa arwa vale, ni waaruuwela Masu, ni ophavela waahokoloxerya Mmasuni, awo yaamukhootta. Kweekwe anniira, enamuna yeeyo yo ohononeya.

70 Okathi olumwenku ni ekereja entakaihanaaya vamosa, vano awo khandthuna hat’etthu ya erooho. Awo khandthuna SIISO ANIHIMYA T’APWIYA. Awo antthuna etthu antthunaaya. Awo antthuna olumwenku, ni ohimya wira aKristu; ni okhala

molumwenkuni, ni okhala ni olumwenku, ni okhala ntoko olumwenku, ni nlelo okhala ehimyaka wira aKristu. Moosuwela, etthu ene t'ila, iwo oliyala wa muroohoni. Vekeekhai ti yeeyo ekhanlyaaya. Awo khansuwela taani. Awo aaliyala wira etthu entthuneya awo wira.

<sup>71</sup> Vaakhanle wira mmosa aamoorwa olelo, siiso, aamukhoottiwa siiso. Awo jaarina mwaha wo otepa wa yeeyo, siiso-tho aakhalana olelo. Awo khayaawerya wiisuwanyeiha-tho n'itthu sa wirimu, okhala wira khayaatthuna. Masu, Ehapari yooreera, awo khayaatthuna Eyo. Eretta ya etampi yaahaahaaxa, n'awo yaaniphenta yeeyo.

<sup>72</sup> Etampi ti yoosivela wa murima woohirukunxiwa. Eyo enkhalana ntoko yooreera wa muupuwelo woohirukunxiwa, masi ti ephiro ya mookhwaani. Khenihala etthu woohikhala okhwa. "Nlivelu na etampi okhwa," ni nyuwo muhaana ohepha ilivelo iyo. Nyuwo muhaala mutthekuni, nto vano munihepha eyuupuru.

<sup>73</sup> Ithoonyeryo sa erooho ni olaleerya wa namitthaka ookhalihwiwa a Muluku, khonattikeleke-tho waathukumeliha murima. Athiyana yaaniwerya waatheyasa owiitho waya, ni wira, "Miyo nkirina yo orowa wiiwa etthu ntoko eyo." Vakhala wira eyo khetthikenle-tho! Exeeni iyo? Oliyala wa muroohoni, vekeekhai ti yeeyo ekhanlyaaya. Awo aaliyala wira Muluku ni Masu Awe ari mmosaru, ni Owo khokhanle orukunxaka Yaawo.

<sup>74</sup> Profeta akhumelelaru vanlakani mahiku ale ni ovaha ethoonyeryo ya erooho, nsu na erooho, ni ovaha nsu na Muluku ottuli waya, awo yaamutheya Nenlo paahi ni onyemula.

<sup>75</sup> Nyuwo munnisuwela nlikanyiho na khalayi, "Alolo anneetta ni ixapattho sa misomari vaavo Malaikha anoovaaya onyakela." Ti yeeyo oliyala wa muroohoni oniiraaya. Eyo enniwiiriha atthu ophiyerya nipuro mpakha ahinkhalanaaya moonelo muhina mwaya. Awo khandthuna etthu ekhanle ya erooho.

<sup>76</sup> Mukuxe muthukumano w'ekeekhai wa erooho, vaavo Erooho Yoowaarya enaavonihaaya aretta ni elamulaka soowuupuwela siri mmurimani, ni muhele eriyari ya ikereja sothene, muthukumano muulupale paahi wa mustaatiyuni mu, nto nwehe etthu yaarowa okhumelela. Muhina mwa minuutu vakhani, atthu othene yaamurowa ovenya n'ukhuma. Awo kharina naata n'yo. Awo khandthuna hat'etthu ni yeeyo. Awo anrowa owiriyana olavula w'akhili.

<sup>77</sup> Masi waahimmwaka Owerya wa Yesu Kristu, ni ohihimuwa Wawe, ni Erooho Yoowaarya, awo khandthuna hat'etthu ni Yeeyo, okhala wira eyo ennaapwapwela. Eyo ennaakhaliha oovihiwa ni etthu jaarinaaya osuwelaka. Ohikhala ehukhumu, vekeekhai, ti yoosivela mwa okathi mmosa. Masi, eyo, nyuwo mwaivahererya-ru wa yeeyo, eyo—eyo enniruuha mihokorokho sa orukunxa murima. Tivo ninnoona wira, okathi oliyala nno

wa muroohoni onaavaraaya atthu, vano awo—awo ankhala ni mukhalelo wootakhala. Vano hiyo ninnoona etthu emosaru vano. Vano kintthuna o . . .

<sup>78</sup> Muhaana osuwanyeihiwa. Nipuro nlo, muhaana wooniherya. Makhalelo anyu annooniherya, ohiy'ula, nipuro munsuwanyeihiwaanyu. Nyuwo munsuwanyeihiwa mwa Kristu wala ota wa Kristu. Khimukhanle mwa nuusu. Khekhanle etthu ene eyo ntoko mutthu oohapaliwa ni oowiisuwela. Khaavo mwaapalame ooriipa-ootteela. Nyuwo munkhala owoopowa ahiiso ohoopowa. Nyuwo mwa mutthu ooreera murima wala natampi, mmosa wala mukina, ni mweettelo anyu wa muroohoni ohoolo wa Masu a Muluku onnoosuwanyehani oratteene vatthu mweemenly'anyu. Khweeli!

<sup>79</sup> Masu a Muluku, oolipiheriwa, ahooniherya wira opatiiso wa Erooho Yoowaarya ti siiso ntoko waatonko aya okhala Nihiku na Pentekosite wala okathi p'ukathi mukina. Ni Yesu Kristu mmosaru nsana, olelo, ni mahiku othene. Ni mweettelo anyu ohoolo wa Yeeyo onnisuwanyeiha vakhala wira murina oliyala wa muroohoni, wala nnari. Ti yeeyo. Voohicala wira mwa tiyaakono, wala hata wira mwa mulaleyi, eyo khenkilaliha. . . Ayo, awo onnaavaha, nave. Vano hiyo ninnoona wira, eyo ti yooravihaneya ni ennihaaxa etthu yothene. Vano hiyo ninniweha.

<sup>80</sup> Vano, wira mukhale mutthu a wAmerika. Wira kikhale mutthu a wAmerika, kihaana osuwanyeihiwa n'ilapo aka. Vano nwiriyane oratteene. Okhala mutthu a wAmerika, kayariwa elapo yeela, miyo kinikhala nammuttettheni, ni miyo kinsuwanyeihiwa ni elapo yeela. Sothene eyo ekhanlyaaya, miyo ka yeeyo. Sothene enikhalakaaya, miyo ka yeeyo. Maana miyo kinsuwanyeihiwa ntoko mutthu a wAmerika, vano kihaana okuxa ehaaya awe yothene, nttittimiho awe wothene. Khula etthu okhanlyaaya, miyo ka yeeyo, okhala wira kinsuwanyeihiwa ni yeeyo. Amen. Kintthuna wira mwiiwe saana. Miyo kinsuwanyeihiwa ntoko nammuttettheni a wAmerika, vano sothene aaryaawe, miyo ka yeeyo. Sothene okhanlyaawe, miyo ka yeeyo. Miyo kihaana okhala epantte ya yoowo. Miyo kihaana. . . kaakhanleene nammuttettheni a wAmerika, miyo ka epantte ya Amerika. Ni sothene okhanlyaawe, miyo ka yeeyo.

<sup>81</sup> Kihikhalakhale kiliyalaka yeela. Katthuna okhala nammuttettheni a wAmerika eekeekhai, kihaana wuupuwela wira ka ele ekhanlyaaya elapo aka, maana miyo kinsuwanyeihiwa ni elapo aka. Oliyala eyo, wala—wala. . . Owanela ekhotto, wala okhwela, wala weemererya sothene eyo eneemereryaaya, miyo kihaana weemererya. Ele ekhanle elapo aka, miyo ka yeeyo. Ele eneemereryaaya, miyo kineemererya yeeyo. Okhala mutthu ooromeleya a wAmerika, kinookhala oolikana wira kimukhwele, owana mwaha wa yoowo, weemererya yeeyo, wira khula etthu ekhanle. Miyo ka epantte

ya yeeyo. Khimukhanle wuulumela eyo muhikuulumenle miyo. Mwaahimyaka etthu ya nthowa ni yeeyo, munikihimyana miyo, maana miyo ka mutthu a wAmerika. Woohimyanani nthowa nyuwo, ntoko mutthu a wAmerika, ni etthu anihimyanaaya nthowa elapo ela, awo anoohimyanani nyuwo, maana nyuwo mwa epanthe ya yeeyo. Muhikhalakhale muliyalaka; mwaliyala vale, weeso muhaana eretta yo oliyala, vekeekhai.

<sup>82</sup> Ni, muupuwele, nyuwo khamuhiyo-tho nammuttettheni a wAmerika mwaahiweryeke okhala epanthe ya yoowo. Muhaana okhala, ele Amerika okhanlyaawe, nyuwo muhaana okhala nave. Kihaana wira mpanthe wa yoowo. Ela elapo aka, miyo kihaana okhala mpanthe ya yeeyo. Ele ekhanlyaaya, miyo ka yeeyo. Moone, etthu eyo yaaryaaya, miyo ka yeeyo. Hata wira yaari exeenii, miyo nlelo ka yeeyo eyo yaaryaaya.

<sup>83</sup> Okhala mutthu a wAmerika, miyo kaahipakhuwa oPlymouth Rock, ni yoowo, ni amuharoiye. Kaahaana; miyo ka epanthe awe. Kaaheettiha ekhavalu ni Paul Revere, wira kimulopole mwaha wa soowoopiha. Kakhala mutthu eekeekhai a wAmerika, miyo kaahipakhuwa oPlymouth Rock. Kaaheettiha ekhavalu ni Paul Revere, wira kimulopole mwaha wa soowoopiha saya. Moosuwela etthu enihimyaaka vano?

<sup>84</sup> Kaahimulapuwa Delaware a exeelu, ni George Washington, ni anatoropa awe oohiwara ixapattho. Miyo kaari weiwe, maana kinsuwanyeihiwa ni elapo ela. Etthu owo iiraly'awe iwe yaari epanthe ya miyo, etthu eniiraaka vano epanthe ya yoowo. Miyo kaahisuwanyeihiwa ni Washington, oDelaware.

<sup>85</sup> Kaaheemela ni Stonewall Jackson, okathi sothene saaryaaya soohimurerela, vano khukohiwa, "Muniwerya sayi weemela ntoko exiri ya maluku, okathi sothene sinoovirikanyaayani?" Mwaamulopwana owo a ehaaya a maitho ooripelela khutatha ntthupi ni ipoota sawe, owo khwira, "Miyo nkinatoko owurya maasi kihitonko omuxukhuru Muluku Oowerya sothene mwaha wa yeeyo." Kihaana weemela ntoko exiri ya maluku ni yoowo. Kaaheemela iwe ni Stonewall Jackson. Wira kikhale mutthu a wAmerika, kinsuwanyeihiwa ni yoowo ni mweemereryo awe. Nilapuwaka miratthi Delaware! Niwanaka ikhotto!

<sup>86</sup> Kaahiweliha epantera. Kaari ni yaawo okathi yaawelihasaaya epantera oGuam. Okathi anatoropa ikonto sene a wAmerika yaavaherenryaaya ekumi aya, ni okathi nikhuru nle naamukhaani naatthimakenlyaaya iwe khuweliha epantera, miyo kaahisuwanyeihiwa woowelihani epantera ele; khula mmosa a hiyo aahikhala. Anammuttettheni othene a wAmerika yaahisuwanyeihiwa ni epantera ele yaawelihiwe oGuam. Vaiwalyaaka wira awo yaahiweliha epantera ele iwe, maithori yaahimora mmalakuni mwaka. Ole kaari miyo. Ole mwaari nyuwo. Eyo yaanihimya hiyo othene, okathi naasuwanyeihiwaahu iwe ni yeeyo.

<sup>87</sup> Sothene owo okhanlyaawe, miyo ka yeeyo. Nttittimiho awe wothene ti nttittimiho aka. Ehaaya awe yothene ti ehaaya aka. Owo aira itthu soowuuliha muru, vano kihaana oweha yawawe... ovilela oveehiwa wawe. Owo aakhela nttittimiho, miyo kinaakhela nttittimiho ni yoowo, okhala wira miyo kinsuwanyeihiwa ni yoowo. Vano, wira osuwanyeihiwe, mutthu a wAmerika ohaana ovilela ehaaya yothene ya wAmerika, nttittimiho wothene wa wAmerika, sothene owo otonko awe okhala. Sothene owo okhanlyaawe, wala etthu onrowaawe okhala, nyuwo munsuwanyeihiwa ni yeeyo.

<sup>88</sup> Vano, okhala muKristu eekeekhai, nyuwo muhaana okhala siiso. Hiyo khaninthuna oliyala eyo. Sothene Owo aaryaawe, miyo kinsuwanyeihiwa ni Yoowo. Miyo kinsuwanyeihiwa ni Yoowo.

<sup>89</sup> Nwehe, ni Owo ori mwa miyo, ni miyo mwa Yoowo. Nwehe, nto, khula muKristu okhanle muKristu eekeekhai ooloka—muKristu, aari ni Yoowo, “Okathi ittheneeri s’oxaka saaipaaya vamosa ni aana a Muluku yaakhuwelaaya mwaha wo otthapa, ohinatthi okhala opattuxiwa w’olumwenku.” Hiyo nisuwanyeihiwe mapuro a ohikhwa ni Muluku, iyaakha imilyawu muloko olumwenku ohinatthi opakiwa. Miyo kaari weiwe ni Yoowo. Vakhala wira kookhalana Ekumi Ehinimala, kaari weiwe ni Yoowo. Miyo kaahisuwanyeihiwa ni Yoowo, “Okathi ittheneeri s’oxaka saaipaaya vamosa ni aana a Muluku yaakhuwelaaya mwaha wo otthapa.”

<sup>90</sup> Miyo kaari ni Yoowo okathi Owo omwiihanne-awe Abrahamu okathi wa—wa iyaakha miloko mithanu na miili ni thanu, ni amwaar’awe aryeene iyaakha miloko mithanu na mosa ni thanu, ni kaahimuhimeerya wira awo yaamurowa okhalana mwaana. Miyo kaari ni yoowo okathi aakhanlyaawe oolipa ni SIISO ANIHIMYA T’APWIYA, “Kinoorowa okhalana mwaana.” Miyo kaahikhala ni yoowo. Khula muKristu mukina aahikhala ni yoowo. Miyo kaari ni yoowo okathi ottehattehiwa wawe waarwiiyaaya. Miyo kaari ni yoowo okathi owo aawenlyaawe vasulu va mwaako, wira anvahererye Isakhi. Miyo kaari ni yoowo okathi epwittipwitthi ekhumelenlyaaya.

<sup>91</sup> Miyo kaari ni Yosefe okathi aakhoottiwaawe n’axinna awe, okhala wira owo aari a erooho ni akina aya yaari a erutthu. Miyo kaari ni yoowo okathi aasuwenlyaawe oveehiwa owo aarinaawe ovilela mwaha wa axinna awe. Etthu owo aary’awe, miyo ka yeeyo. Ele miyo kiryaaka, owo aari yeeyo. “Maana hiyo othene na mmosaru mwa Kristu Yesu.” Miyo kaari ni Yosefe mulittini mwawe, mahiye. Miyo kaari ni yoowo okathi aaronwaawe moonoo woolopwana wa Farawo. Nyuwo mwaahaana osuwanyeihiwa ni yoowo.

<sup>92</sup> Kaari ni Yakope ohiyu ule owo aawanne-awe ohiyu wothene ni Nlaikha. Miyo kaahiwana, yoomi. Miyo koosuwela

saanvirende. Tivo miyo kaahiwana vamosa ni Yakope okathi mmosaru, maana miyo ka munn'awe.

<sup>93</sup> Miyo kaari ni Moise okathi aaronwaawe wEjitu. Miyo kaari ni Moise vamwiiwani waavarela. Mwaari muKristu, munsuwanyeihiwa ni atthu awo a mBibiliani. Muhiliyale eyo! Miyo kaari ni Moise okathi atthu othene yaamurukunuwenlyaaya enanvirikanya. Miyo kaari ni Moise okathi aalapunwaawe Ephareya Yooxeerya. Okathi ovenxalyaawe ntata nawe khukelela ohoolo, nto Ephareya Yooxeerya khutthukuwa, miyo kaahisuwanyeihiwa mwa Kristu okathi ene yoowo, ni miyo kaari ni Moise okathi ule.

<sup>94</sup> Etthu p'itthu aKristu ankhalakaaya, etthu khula mulipa-oowaamini onikhalakaawe, khula mulipa-oowaamini vano onsuwanyeihiwa ni mutthu ene yoowo. Etthu p'itthu, nyuwo muhaana osuwanyeihiwa. Muhiliyale eyo. Mwaira vale, moophwanya oliyala wa muroohoni; mooliyala ole mukhanlyaanyu.

<sup>95</sup> Vano oosuwanyeihiwa ni yoowo, ni Moise, okathi owo aalapunwaawe ephareya.

<sup>96</sup> Miyo kaari ni Eliya mahiku a Akhabi, okathi awo yaarinaaya omuthanla ole yaarowaaya omurumeela, Muluku wala Palaamu. Hiyo naari ni yoowo Omwaako Karmelo, okathi waarinaawe othanla nno, maana hiyo ninsuwanyeihiwa mw'Erutthuni ya Muluku mmosaru yoowo owo aasuwanyeihiwaawe-mo. Tivo vakhala wira ninsuwanyeihiwa mw'Erutthuni mwemmo, vano nihaana wuupuwela wira naari weiwe ni yoowo. Ti yeeyo.

<sup>97</sup> Vano, miyo kaari ni Davidi, okathi aakhoottiwaawe n'axinna awe. Miyo kaari ni Davidi; ni nyuwo mwaahikhala, nave, mwakhala muKristu. Muhaana osuwanyeihiwa mookhoottiwani mwawe.

<sup>98</sup> Miyo kaari n'ana aHeperi, muttukutthani mwa mooro, okathi mo—mooro wahaawenryaaya waapaha mwaha wa Mukhalelo wa Mutthu a neexexe.

<sup>99</sup> Miyo kaari ni Daniyeli, mulittini mw'akharamu. Miyo kaahisuwanyeihiwa mwemmo, okathi Nlaikha n'Apwiya naamusuwanyeihiyaaya owo mwemmo.

<sup>100</sup> Miyo tthiri vekeekhai kaari ni Yoowo oKalvario. Miyo kihaana osuwanyeihiwa ni Yoowo oKalvario. Kihaana okhala weiwe, mpakha, kahaakhanlyaaka oosuwanyeihiwa paahi ni Yoowo oKalvario, kaahikhwa ni Yoowo oKalavrio. Khula muKristu ohaana okhwa ni Yoowo oKalvario. Nyuwo mwaahikhwe ni Yoowo oKalvario, khivanweryaneya okhala mmosa wa ale Awawe. Miyo kaari weiwe okathi Owo okhwiyaawe. Miyo kaahikhwa ni Yoowo. Vano nto kaari ni Yoowo okathi Owo ohihimunwe-awe mw'alipa-ookhwa. Miyo koohihimuwa voosiisu wa Paasikha ni Yoowo, woohihimuwani.

Etthu p'itthu Owo oiralyaawe, miyo kaari weiwe ni Yoowo; khula mulipa-oowaamini aari siiso.

<sup>101</sup> Nto vano miyo kikilaanthe ni Yoowo Mapuro a Wirimu mwa Kristu Yesu, ni owerya wothene wa omooroni wooxinttiwa, mwa Yoowo. Khula mulipa-oowaamini muKristu okilaathihiwe enamuna emosaru, okhala wira muhaana osuwanyeihiwa.

<sup>102</sup> Vano kimpchwanyaneya yoomi, mahiku ala ookiserya, ni anci-ene a aKristu oowaamini, oosuwanyeihiwa mmutekoni mw'Awe. "Owo mmosaru nsana, olelo, ni mahiku othene." Kimpchwanyaneya yoomi, olelo, oosuwanyeihiwa mmutekoni mw'Awe. Nyuwo mumphwanyaneya siiso, mwaaminiki, mweettaka ni yeeyo? Nwehe, miteko Owo ovanryaawe, Owo ohimmye wira mulipa-oowaamini aamurowa wira etthu emosaru. "Miteko Miyo sinvaraaka nave-tho nyuwo munoovara." Vano munoowerya osuwanyeihiwa ni Yoowo? Vano okathi othanyiwa wa Masu onrwaaya, nyuwo munoowerya ovilela othanyiwa ntoko Owo siiralyaawe, moone, oosuwanyeihiwa ni Yoowo? Miyo kaahisuwanyeihiwa ni Yoowo.

<sup>103</sup> Miyo kaari ni Yoowo Nihiku na Pentekosite. Miyo kaari n'awiixutti osulu iwe, oosuwanyeihiwa ni yaawo mopatiisuni mwa Erooho Yoowaarya.

<sup>104</sup> Kinniikoha khama ekereja khephwanye oliyala vanci-ene vano mpakha awo ahi, akina aya, hata ahinaamini-aya wira yookhala etthu ene eyo ntoko Erooho Yoowaarya. Munnoona vatthu ekereja ephiyalyaaya? Mwaha mmosa wootepa wo oliyala! Moone, awo aaliyala wira ole aari Yesu Kristu iwe. Awo aaliyala ele aari Yesu Kristu. Awo aaliyala. Awo yoono wira Owo aari mu—mulipa a ikano, wala profeta, wala mu—mutthu ooreera murima. Awo yaahiliyala wira Owo aari Muluku. Awo aaliyala wira Owo mmosaru nsana, olelo, ni mahiku othene. Ni ekereja yoophwanya mwaha wootepa wa oliyala wa muroohoni. Awo aaliyala itthu iya sothene. Awo khansuwela-tho Yeeyo.

<sup>105</sup> Nihaana okhala n'awiixutti oPentekositeni, oosuwanyeihiwa ni yaawo. Miyo kaahisuwanyeihiwa ni mutthaka wa Petru Nihiku na Pentekosite, mwa Miteko kapiitulu 2. Kaahiiwa etthu owo aahimyyaawe. Miyo kinnaamini etthu owo ohimyyaawe. Miyo kaahiiwelela etthu owo ohimyyaawe. Vano miyo kinsuwanyeihiwa mw'etthu emosaru.

<sup>106</sup> Muhiphwanye oliyala wa muroohoni. Okhala wira, mwaphwanya vale, munimwiisuwanyeiha n'itthu ekina. Mukhale oratta-ene ni Masu awo!

<sup>107</sup> Hiyo naari ni Ekereja okathi erummwaaya ni Yesu Kristu, mwa Miteko, kapiitulu 16. "Murowe mulaponi mothene, mwalaleerye Ehapari yooreera soopattuxiwa sothene." Miyo kintthuna kisuwanyeihiwe vaavo, "Olumwenku wothene, wa soopattuxiwa sothene." "Ithoonyeryo iya sinimwaathara ale anrowa waamini," anwerya osuwanyeihiwa mwa yeeyo.



108 Ahe, vano, nyuwo munsuwanyeihiwa ni yeeyo, wala moophwanya oliyala wa muroohoni, munsuwelaanyu wira khimunaamini wira ithoonyeryo iyo sinnaatthara alipa-oowaamini? Moone, nyuwo mwaahaaminiki, vano muhaana oliyala wa muroohoni, moone, mooliyala wira Muluku oolaiherya yeeyo. Owo ohimmye wira, “Ithoonyeryo iya sinimwaatthara ale anrowa waamini.” Muhiliyale eyo. Khimukhanle oliyalaka eyo khukhala muKristu. Muhaana osuwanyeihiwa ni yeeyo.

109 Muhaana osuwanyeihiwa ni Yohani Oowaarya kapiitulu 14, versiikulu 12. “Ole onikaamini, miteko Miyo sinvaraaka nave-tho owo onoovara.” Muhiliyale eyo. Mwaaliyalaka, vano muhaana oliyala wa muroohoni. Mooliyala ole mukhanlyaanyu. Mooliyala ele enihimya onamoona anyu.

110 Ankhi, ele Owo ohimmye-awe wira, “Nyuwo mwakhala mwa Miyo, nave Masu Aka mwa nyuwo, munoowerya ovekela ethu entthunaanyu nto munimwiireliwa?” Munnisuwanyeihiwa vaavo, wira mwaamini wira eyo Ekeekhai? Marku 11, okathi Owo ohimmyaawe wira, “Mwaireraru mwaako ola, ‘muthaame-vo,’ muhihoveryaaka mmurimani mwanyu, masi mwaaminiki wira ehimmyanyu enimwiiraneya, munimwaakhela ehimmyanyu.” Munniwerya osawanyeihiwa vaavo, wira mwaamini wira eyo Ekeekhai? Yaahiireye, weeso muniphwanya oliyala wa muroohoni.

111 Ni—ni munooliyala, munoopwetexa olipa wa oKristu anyu. Khimunwerya ohimya vatthu vaniiraanyu mpantta. Nyuwo muniira, “Miyo ka Mmetotista. Miyo ka muPatista. Ti yeeyo ensuwelaaka. Miyo ka muPentekosite. Miyo ka *ela, ele*, wala *ekina*.” Mwiikasoope! Eyo pooti ohimya wira eneneeryo ya eretta enimoonihereya mwa nyuwo, wira moophwanya oliyala wa muroohoni.

112 Nyuwo muniira, “Ahe, Munna Branham, miyo—miyo kinaamini *ila*, ni miyo—miyo onnikirikela. . .” Vano nwehererye minuutu mmosa paahi. Vakhala wira Muluku oolaiherya wira itthu iya, ni oohimya wira saamwiiraneya mahiku ookiserya, vano eyaaminelo anyu khuyookhoottihani, eyo ethoonyeryo yooreera kinweryaaka woona eneneeryo ya eretta mwa nyuwo. Oliyala wa muroohoni. Mooliyala wiisuwanyeiha ni Masu.

113 Nyuwo muniira, “Miyo nkinaamini wira aretta annivonihwi.” Nyuwo mookhalana oliyala wa muroohoni.

114 Nyuwo muniira, “Nkinaamini opatiiso wa Erooho Yoowaarya.” Oliyala wa muroohoni!

115 Nyuwo muniira, “Miyo—miyo nkinaamini wira Muluku aahilaiherya wira itthu iya mahiku ookiserya.” Weeso mwiwelente eyaaminelo, wala mwiixuttiho khata, omuhiya Bibilia. Murina oliyala wa muroohoni. Nyuwo khamunsuwela vatthu vaniir’anyu mpantta weeso. Nyuwo munihimya okhala,

“muKristu,” nave mukhoottaka Masu. Enoohokoloxeryani-tho mooliyalani wa muroohoni, moone, khamunsuwela vaneemelaanyu. Murina oliyala wa muroohoni. Khamunwerya wiisuwanyeiha ni Soolempwa.

<sup>116</sup> Muhaana okhala n’awiixutti. Muhaana okhala ni Soolempwa sothene, ni Ekereja okathi erummwale-aya. Masi, vano, okathi Ekereja erummwale-aya, “Murowe mulaponi mothene mwalaleye Ehapari yooreera; ithoonyeryo iya sinimwaattthara ale anrowa waamini,” iwo ti waari orummwa waya. Vano awo yaahikhalana . . . Iwo waari orummwa.

<sup>117</sup> Masi awo aaphwanya mwaha wo otepa wa oliyala nno wa muroohoni, ntoko Hawa saaphwanye-awe mwa . . . mwa yoowo, omatta, nihiku nimosa. Vano owo ori ntoko Isarayeli, onwereiwa eretta emosaru yeela, oneeniwa mwaha wa yoolya ya oseminaariyu enrowa woophwanyihani oliyala wa muroohoni. Mulye yoolya emosa ya oseminaariyu, nto munoooneeniwa, vano nto, naanaanoru, munoochwanya oliyala wootakhala saana. Nyuwo khimunaamini hata etthu emosa Bibilia onihimyaawe.

<sup>118</sup> Owo t’okhanle mulattu ni ekereja olelo. Owo t’okhanle mulattu hiyo nihinwerelaahu okhalana muhakalaliho olelo. Owo t’okhanle mulattu n’atthu olelo. Ankhalaka oopuruleliwa mwa khula enamuna ya itthu, ni khula ismu siweryaneiyeye otothola, mpakha ahinsuwelaaya exeeni eri yooreera ni yootakhala. Vekeekhai. Eyo khenwerya omuupuwela Pwiya aya. Eyo khenwerya wuupuwela Masu Awe. Eyo khenwerya omuupuwela natiri.

<sup>119</sup> Owo tthiri ti waari mulattu ni Isarayeli, okathi Yesu orwiiyaawe vanlakani. Awo khiyaawerya wuupuwela, wira, “Mwali harusi onoorupala.” Awo khayaawerya wuupuwela wira Moise aahihimya, “Apwiya Muluku anyu anoomuthanla Profeta oolikana ni Miyo.” Awo yaarina oliyala wa muroohoni.

<sup>120</sup> Eyo vekeekhai t’ile ekereja erinaaya olelo. Owo ohimmye wira, “Enimwiiraneya mahiku ookiserya,” wira itthu iya saamwiiraneya, ninooonahu siiraneyaka, ni ekereja entthikela ekhalaka yookhwaaxa mwa owerya. Exeeni iyo? Oliyala wa muroohoni. Hiyo niniisiihana Pentekosite, nave khaninwerya osuwanyeiha, ni khaninwerya wiisuwanyeiha mmansihu mwa Masu okathi Awo anlaleeriwaaya mwa owerya wa ohihimuwa wa Kristu; ni Owo oryeene va eriyari ahu, apakaka, ni airaka voolikana ele Owo aahimmyaawe wira aamwiira. Vano, paasoopa, enamuna ahu ya muromolelo yoonikeliha mooliyalani wa muroohoni. Hiyo ninooahaawa. Hiyo khaninsuwela vatthu vaniiraahu mpantta. Mmosa onkuxa ipaphelo sawe okhuma ekereja *ela* arowaka ekereja *ekina*, ni ekereja *ela*, ni ismu *ela* vano ismu *ele*. Munnona?

<sup>121</sup> Etthu hiyo entthunaahu, tho, ti Amosi mukina orwa vanlakani, ni SIISO ANIHIMYA T’APWIYA.

Hiyo naammwaakhela? Yaamukhala ntoko awo. Awo khamwaakheleke owo. Awo khiyaarowa omwaakhela olelo. Owo yaammurikela wooniherya muru awe nipuro nimosa, khino, wira alalaye. Vano, eyo ekeekhaii voolikana, okhala wira ekereja enwereiwa oliyala wa muroohoni.

<sup>122</sup> Vano, mwaha wa xeeni? Muluku aahilaiherya mahiku ala ookiserya, “Okathi Mwaana a mutthu aarowaawe wiisooniherya,” voolikana ni Luka, kapiitulu 17, “okathi ethooneryo yaakhumelela oSotoma, yaarowaaya wiiraneya-tho.” Ni athu annoona eyo wiiriwa, nave akina wa awo hata khanaamini. Awo anuupuwela wira eyo osoma miyuupuwelo. Awo anuupuwela wira eyo erooho ya xetwani. Exeeni iyo? Awo anoowereiwa oliyala wa muroohoni. Eyo ekeekhaii. Awo khanwerya waasuwela saana Apwiya. “Yesu Kristu mmosaru nsana, olelo, ni mahiku othene.” Etthu Owo aaryaawe okathi ule, Owo ti yeeyo vano.

<sup>123</sup> Masi, exeeni yiiraneieye, khaninwerya tu wiisuwanyeiha mmansihu ni Masu. Mwaha wa xeeni? Eyo, eyo khensuwela sinto eyo elooa wala sinto ekereja. Eyo khentthuna wiitthaniwa elooa, ni khinweryaneya wiitthaniwa ekereja; okhala wira, wiitthaniwa ekereja, yaamwiisuwanyeiha ni Kristu. Eyo enniruuwela oliyala wa muroohoni. Ni khentthuna wiitthaniwa elooa. Vano eyo kehiyo ekereja ya Pentekosite, ekereja Metotista, ekereja Patista; eyo elooa ya Pentekosite, elooa Metotista, ni elooa Patista okhala wira khenwerya wiisuwanyeiha ni Masu. Nto Masu yaaisooniheryaka, awo nlelo khanaamini Yaawo. Eyo eretta, oliyala wa muroohoni. Khanwerya wiisuwanyeiha; awo khansuwela vatthu vaniiraaya mpantta. Ti yeeyo.

<sup>124</sup> Vekeekhai eri ntoko otakanxa mixovo sa etthu. Ntoko sinihimyakaaka imaara sinci-ene, “Miyo kweekwe kuupuwelaka wira emosa wa itthu soophepuwaxa kitonko aka wona aari muula.” Moone, owo muxovo wootakanxiwa. Moone, ame awe yaari ekhavallo y’ethiyana, atithi awe yaari puuru, nto owo hata khonsuwela t’a yayi. Nto naanaanoru, nyuwo—nyuwo—nyuwo—nyuwo munoowerya omutakaniha muxovo ni okhumela puuru, vano nto...ahiiso okhumela muula, masi muula khonwerya oyara-tho. Moone, owo khonwerya. Khivanweryaneya omwiixuttiha etthu. Owo t’olipa muru. Nyuwo khimunrowa nnakhala omuleela etthu. . . .Nyuwo pooti oreherya maaru ale maalupale oorekama. Nave owo onoolipelela mpakha nihiku noorakamaxa na ekumi awe, okathi vakhani ohinatthi okhwa, wira oovaheni munyethe. Ti yeeyo tu. Owo okathi wothene onoolipelela wira ookattyamiheni ni etthu, awerya vale.

<sup>125</sup> Nto eyo enikuupuweliha anci-ene wa ale aniihaniwa aKristu ootakanxiwa muxovo. Awo aatakanxa mixovo ekereja mpakha

ophwanya eretta ya oliyala wa muroohoni. Awo khanwerya-tho okumiherya etthu.

<sup>126</sup> Onihimmwa nakuho ootakanxiwa mixovo. Nakuho ootakanxiwa mixovo khahiyo etthu. Eyo etthu yootepaxa onanara mwaakhanle anyu ohelaka mwaano mwanyu, etthu p'itthu yootakanxiwa muxovo. Mwaha wa yeeyo murin'anyu okuxa miri iya sikhaani sa ivivero, ni itthu soopahuliwa mixovo, ni omisererya ni ohela mirette ni weepesa. Mwaha wa xeeni? Okhala wira khasinwerya owoomola axiitthu.

<sup>127</sup> Masi ole wooloka, wa muxovo wooloka, khamurina ohelaka murette w'owiiva axiitthu. Owo wookhalana Owerya muhina mwaya, wira aakhaliheke ottaiwene wa yoowo. Ti yeeyo entthuneya wira yaakhaliheke axiitthu a ohaamini ottaiwene wa mutthu a Erooho ooloka ni eekeekhai.

<sup>128</sup> Mmukuxe muula, murowe mwalavulele ni yoowo, mwiire, "Mwiire, mmiravo, kintthuna wira mwiire *ela, ele.*"

<sup>129</sup> Owo onoohala eemenle vale, "Ho! Ho! Ho!" Maaru ale maalupale ewelaka ni ekhuruwaka. Miyo koowoona a—aKristu anci-ene siiso, aniihaniwa siiso.

<sup>130</sup> Nyuwo muniira, "Yesu Kristu mmosaru nsana, ni mahiku othene. Ithoonyeryo iya sinimwaatthara ale anaamini."

<sup>131</sup> "Ho? Kinnaamini wira mahiku a miiriirya aavira. Ho? Ho? Ho?" Moone, owo khonsuwela etthu onaamini awe. Owo khonsuwela etthu. Owo khonsuwela otthu onikhumaawe-wo; owo khonsuwela otthu onrowaawe. Owo orina oliyala wa ekhavallo. Owo khonsuwela otthu onikhumaawe-wo, ni khonwerya orowa-tho ottaiwene.

<sup>132</sup> Masi okisivela ole a ephome yooloka. Oh, owo t'oreera murima. Munoowerya olavula ni yoowo. Owo onnisuwela taani yaari apap'awe, taani yaari ame awe, taani yaari apwaapu awe ni apiipi awe. Owo ohaana ipaphelo sa muxovo wira ooniherye onikhumaawe-wo.

<sup>133</sup> Ni miyo okisivela muKristu ookhalana muxovo, onwerya otthikela Masu a Muluku, nihiku na Pentekosite, ni wiisuwanyeiha mmansaya weiwo n'atthu ooreera murima, weiwo Owerya wa Erooho Yoowaarya waakhuruwenly'aya. Owo ti muKristu orina muxovo. Owo onnisuwela otthu onikhumaawe-wo. Owo khonsuwanyeihiwa ni aMetotista, aPatista, wala etthu ekina. Owo onsuwanyeihiwa mwa Masu a Muluku. Owo onnisuwela oratteene vatthu varyaawe. Ephome y'omwene y'Atithi awe ennikhwalala mwa yoowo; Ephome ya Yesu Kristu. Owo onnisuwela etthu Eyo eniiraaya! Owo onnaamini Masu othene. Muluku onnivara muteko mwa yoowo n'ulipiherya ni ithoonyeryo Owo aalaihennyaaawe wira saamatthara. Owo khorina oliyala wa muroohoni. Owo t'a ephome yooloka. Miyo okisivela eyo.

134 Masi ekereja olelo erina eretta yootepa ya oliyala wa muroohoni. Khensuwela vaniiraaya mpannta. Yooliyala sothene ya Yeeyo, yooliyala itthu iya sothene enikhaliha Ekereja.

135 Exeeni enikhalinhe othaaciri ntoko siryaahu? Niroophiyerya-tho nipuro na Lawotiseya, khutthikela nipuro nle na othaaciri ntoko Isarayeli saaryaawe. Okathi yaaryaaya masikhini ni yaarinaaya omuroromela Muluku mwa itthu sothene saakhanlyaaya wiiraka, sothene saarinaaya, yaamuroromela Muluku; vano Muluku aari ni yeeyo, ni yaari ya erooho, vano eyo yaahikelela ohoolo. Masi vakhanlyaaya thaaciri, va ti ele yiiraneie: ipooma saya saahitekiwa, ni athiyana aya khukhala oohureya, axilopwana aya yaarootthuniherya, alaleyi aya yaarooresa iwalelo, ni awo yaarimwaahimya maprofeta. Nto eyo ti enamuna ya mukhalelo awo yaakenlyaya-mo. Yaairinhe eyo, waari oliyala nipuro iparakha iye saakhumme-aya.

136 Ni nyuwo aMetotista, ni nyuwo aPatista, ni nyuwo aPrespiteriyaano! Nyuwo aMetotista munniwerya omuupuwela John Wesley. Nyuwo aPatista! Ni John Smith aahinla mwaha wa miyaha s'atthu mpakha amwaar'awe yaarinaaya omweettiherya vameesa, maitho awe yaahiipa khutthukeya, mwaha wo wunla ni ovekela ohiyu wothene. Mulattu ene xeeni?

137 John Wesley aahimmye wira emosa wa itthu suulupale... Kookupali wira aari mmosa wa axitiithi aMetotista oopacerya aairale, "Otakhaliwa wa aana axithiyana a ekereja Metotista, waari mwaha wo opacerya okhalaxa a molumwenkuni, yaapacenryaaya owara ipeetthe mukathani mwaya." Owo aarowa ohimya exeeni vano, yaawaraka akaputtula?

138 Exeeni yiiraneie? Oliyala wa muroohoni. Vekeekhai ti yeeyo, mooliyala okhummyaanyu. Nyuwo murina itthu iya sothene mwaha wa ovaha, ni oreera murima wa Muluku owiirenyaaanyi.

139 Nyuwo munuupuwela wira ela etthu yootikiniha? Vekeekhai eri ni Erooho ya Yesu Kristu, yoohimmwa y'eprofeta. Mwa Wisupulula, kapiitulu 3, ehimmye wira, "Okhala wira munihimya wira, 'Miyoka ka thaaciri, khiivo enikithowa,' nave khamunsuwela wira mwa mutthu oohaawa, oohoona, ootakhaliwa, oothoiwa, oohiwar'etthu, nave khamunsuwela" Moone, khamunsuwela! Exeeni iyo? Oliyala wa muroohoni. Awo khansuwela.

140 Ikereja sookhalana mu—musurukhu vano. Ti yoorika, okhala ekereja, mulaponi, muromolelo, ehinifayi itoolare imilyawu vaara imilyawu sene. Etekaka ipa ni itthu sa imilyawu n'imilyawu sene sa itoolare, ni elaleyaka wira Orwa w'Apwiya ori vakhiviru. "Thaaciri, ni khwira, 'Khiivo enikithowa.'" Alaleyi oosomaxa oratteene atonko okhalaniwa, ammusuwela teyoloxiia ohinatoko osuweliwa. Ni arina ipa suulupalexaxa,

mapuro oothanliwa oratteenexa mpooma. Awo aakhalana ephiro yo otaphuwa wa etthu p'itthu awo anthhunaaya wira. Vano nto awo yiirale exeenii? Aphwannye oliyala wa muroohoni ni aaliyala wira aari Muluku owiirenle eyo, siiso ntoko Isarayeli.

141 Ni Bibilia aahilaleerya, Yesu Kristu aahiveleeliha nlaikha Nawe wa Yohani khwira wira, okathi ula wookiserya wa ekereja waamukhalana oliyala nno wa muroohoni. Awo yaari “ootakhaliwa,” muupuwele. Awo anuupuwela wira t'alupale. Awo anuupuwela wira aakhalana etthu. Masi Owo ohimnye wira awo yaari “oothoiwa, ootakhaliwa, amasikhini, oohoona, oohiwar'etthu, nave khayaasuwela.” Ni khiyaavo enamuna yo waahimeerya.

142 Vano, vaakhanle wira mulopwana mmosa aari nno mphironi, ootakhaliwa, wala muthiyana, oohiwar'etthu, mphironi, oohoona, owo waamukhala mukhalelo wookhupanyereya ophwanyaneya mwa mukhalelo yoowo. Masi nto awo yaarina-ru muupuwelo aya wooloka, esuwelaka ele akhanlyaaya, wira awo yaari mutthu, ni wira ahaana owara ikuwo; ahe, nyuwo munookhumela iwo; awo a—awo atthu, antthuneya wira asuwanyeihiweke ni nloko n'atthu; nto ari iwo, “ootakhaliwa, oothoiwa, oohoona, ni oohiwar'etthu.” Vano nyuwo munamurowela, mwiiraka, “Munna, khimuwanre etthu.”

143 “Vano, va! Miyo ka Totori *Lexe ni lexe!* Nyuwo muxikheke mwaha anyu. Kinimooleelani, kiniira mpantte wa *Lexe ni lexe!* *Nyuwo* khuhiyo mwaha anyu, nyuwo santu oophirikeya, okileela etthu!” [Nipuro vahiitthu mufiitani—Mol.]

144 Mwaalele, “Ti yoovonyeya wa mulopwana wira ela, ni atthu wira itthu siniiraaya.”

145 Nto awo animooleelani wira mulaleyi aya t'a muupuwelo wootthukuwa. Munnona? Exeeni iyo? Ti, awo aaliyala sooruma sa Pwiya Yesu. Vano mulipelele Owo akhuruwe apake ithoonyeryo ni mitikiniho Owo ohimnyaawe wira aamwiira, awo khandthuna waamini iyo. Iwo oliyala wa muroohoni. Moone, awo aaliyala! Ni khawar'etthu, nave khansuwela, khansuwela.

146 Awo anuupuwela wira, “Okhala wira kiniira mpantta w'ekereja, eyo ti yothene entthuneya.” Oh, munna, eyo khenihimyaxa etthu wa Muluku ovikana okhala Patarero wala etthu p'itthu ekina, elooa ekina. Wira mpantta wa ekereja, eyo khenihimya etthu wa Muluku.

147 Nyuwo muhaana okhala aana alopwana n'athiyana a Muluku. Nyuwo muhaana oyariwa ni Muluku, ni Muluku ti Masu. Vakhanlyaaka epantte ya atithi aka, kiphiyenrye okhala atithi aka voomalela. Nyuwo mwakhala epantte ya Muluku, munkhala Muluku, voomalela. Masu Awe othene, nyuwo munaamini Yaawo othene.

Oliyala wa muroohoni!

148 Ankhi mwahaasuwenle wira nsina nanyu naari nle nikhanlyaaya? Ni vaari wira, munikhuma mw'emusini mooreera, kinroromelaaka wira ti siiso, mwaakhumme mw'emusini mwa atthu ooreerela, nto ankhi mwaliyala nsina na emusi iyo, nto munakhumela nno, mukhalaka makhalelo oohifayi? Yaamwiiriwa, "Nsina nanyu kanihiyo Jones," wala enakhaleru etthu p'itthu. "Ahe, miyo nkinsuwela kaari aani." Munnona? Vaareera, moone, etthu yoowoopiha okhala siiso, mukhalelo woowoopiha okela-mo.

149 Ahe, tthiri ti vaavo ekereja ephiyenryaaya. Ehaana okhala ethooneryo ya Yesu Kristu. Masi yooliyala eyo, okhala wira, sookelihiwa, iyaaminelo ni miromolelo mwa yeeyo, awo akupanlyaaya yeeyo ehiyaka Masu. "Vano awo t'ohiwara etthu, oohoona, othoiwa, nave khansuwela," ni khiyaavo enamuna yo waahimeerya.

150 Khino siiso kihikhalaka-tho oBirmingham, masi ela emaara emosa anrowaaya wiiwa. Munnona? Munnona? Ekeekhai. Miyo paahi... Miyo nkinthokorerya etthu woohikhala waala Epyo. Muluku t'oneettiherya vatthayani vantthunyaaya Eyo okhala.

151 Yaahiliyala, ayo, awo yaahiliyala Masu a natiri. Awo yaahiliyala. Isarayeli aari mwa enamuna yeeyo y'otthokiha okathi Yesu orwiiyaawe. Yaahiliyala. Awo yaawehererya, oh, awo yaahimya wira yaanaamini wira aanirwa Mesiya. Masi okathi Mesiya orwiiyaawe khwiisuwanyeiha Mmansawe ni Masu, awo yaahikhalana ilimalelo sinci-ene mpakha yaairihalyaaya Masu a Muluku ohikhalana efayita.

152 Ni Yesu aahihimya, okathi vakhani ohinatthi okathi wa wookiseryani, "Ntoko saaryaaya oSotoma, siiso vanookhala." Ni enookhala yoosuwanyeihiwa, nave atthu aakhalanaxa ilimalelo mpakha awo animukhalihaya natiri a Muluku ohikhalana efayita mwaha wa elimalelo aya. Oliyala wa muroohoni! Oliyala wa muroohoni ti yeeyo ekhanlyaaya. Moone, awo aaliyala itthu iya.

153 "Oh, kiniira mpantta wa *ela*. Miyo—miyo kiihira *ela*. Kiihina mwa Erooho. Kiihira *ela*." Ahe, wulu, wulu, eyo kherina naata n'iyoy, nnakhala vakhani.

154 Munwerya sayi okhala muKristu n'ukhootta Masu? Khimukhanle wira. Muluku ti Masu. Masu yakhala mwa nyuwo, nyuwo ni Masu munkhala mmosaru. Yothene ekhanle Masu, nyuwo mwa yeeyo. Amen. Vakhala wira miyo kinkhala nloko nla, epantte ya Masu alaiheriwe nloko nla, miyo kihaana okhala yeeyo. Vakhala wira kinrowa okhala muKristu, kihaana osuwanyeihiwa ni sothene Bibilia onlaleyaawe ni oneemereryaawe.

155 Aleluya! Kinoorowa wiihaniwa santu oophirikeya, khula enamuna, ni kinnoona okhala natiini saana vano. Ayo, mulopwana.

<sup>156</sup> Miyo kihaana osuwanyeihiwa n'itthu sothene Bibilia onihimyaawe. Ni Owo onnihimya soohimya, ni, kaahihaaxiwe ni oliyala nno wa muroohoni wa mahiku a vano, kinookhala ni kinoowerya osuwanyeihiwa ni Yeeyo. Kaakoothaka Eyo, weeso kihaana oliyala wa muroohoni; yookhala etthu yiiraneiyee, kikupanli eyaaminelo wala mwiiixuttiho, wala ekereja wala nikhuru n'atthu. "Nkikhanle wira," nlelo Masu erwaaka wiisuwanyeiha Mmansaya.

<sup>157</sup> Mwaha wa yeeyo Yesu ahaasuveliwaawe. "Oh," awo aniira, "ahe, mulopwan'ola t'owaarya, ni namukuttho ahu oowaarya, oowaarya ahu *ola*."

<sup>158</sup> Nto Yesu iirale, "Nyuwo mwa a atith'inyu, xetwani, ni miteko sawe munoovara."

<sup>159</sup> Mwaahisuwela wira Kayini aahivaha mukuttho wooreera, nave? Owo aari naxariya, aahimuteka altaari, aahikhuna makutha khukokhorela, ni aahivaha mukuttho, ni khumulopma Muluku. Nto vakhala wira, Muluku, ti yeeyo tu Muluku ontthunaawe, wira mwiireke mpantta wa ekereja ni okhalana altaari, ni oliva sa namuloko sanyu ni orowa okereja, ni okhala makhalelo ooreera; vakhala wira eyo ti yothene Owo ontthunaawe, Owo khaari axariya omulamula Kayini, okhala wira owo aahiira etthu emosaru. Ayo, mulopwana. Eyo ekeekhaii volikana.

<sup>160</sup> Masi *etiini* enihimya "ekhuneelo," nave khivanweryaneya okhuneeliwa ni miteko sanyu soorera. Eri etthu emosa paahi Muluku onrowaawe okupali, ni eyo Ephome ya Yesu Kristu. Eyo ti ekhuneelo emosa paahi. Vooikhala yeeyo, nyuwo mwaira, "Mutthareke eyaaminelo," oliyala wa muroohoni! Ti yeeyo yaakhumelenle.

<sup>161</sup> Vano nwehe, awo yaahiliyala Masu aya. Awo yaahimuliyala Bibilia. Awo yaahimuliyala natiri. Awo antthuna akhaleke mukamaamani wa ele yaari aMetotista, ele yaari aPatista, etthu mutthu mukina aary'awe. Va ori natiri a nihiku, ni Muluku amulavulaka Yoowo ni Masu Awe, ni alipiheryaka ni ooniheryaka wira ti siiso, nave awo nlelo khanaamini Yeeyo. Oliyala wa muroohoni! Eyo ekeekhaii volikana. Voomalela, anamaliyala voomalela, khanaamini Iyo nnakhala mara.

<sup>162</sup> Nakhotto mmosa muFransa. Kirooleeliwa ehantisi emosa ekhaani; nihinatthi omaliha. Nkaasuwela wira waahiila siisaale, ni kookhalana makukhu oophiyaka muloko va a soolepa ahanle; nnimoona okathi mukina. Nwehe, nakhotto mmosa muFransa. Yaarimwaakhela nikhuru nimoso na anakhotto mwa anatoropa, ni yaahikhalana oliyala nno. Mwaha wa etuthuwelo, okhottoni. Ni awo yaahikhalana mutthokiheryo, ni awo—awo yaarimwiihana khwaatthuniherya atthu ale yaapweteiye oophentiwa aya wiihana wira yoone sinto yaamuwerya waasuwela amiravo ala. Khiwaakhanle nroromelo wa awo,



khino mmosa wala aili, a yaawo, ti yaasuweliwe. Vano nto khukuxiwa ale akina aya, awo yaarowa oheliwa woopenuxiwani, weiwo awo yaarowaaya okhalaka-wo ekumi aya yothene.

<sup>163</sup> Awo yaawela okerekhere wa ntumuxa, mukampoyini; vano awo khweemela vastasawu, khwaatthuniherya amiravo okhuruwa ni wookola metto saya. Vano makwarta khuruwa vantumuxani, wira yaawehe, okhala wira ni oliyala, vano, awo—awo yaahaana waawehexaxa.

<sup>164</sup> Siiso awo khunweha mmiravo mmosa vale, owo aarookhuruwa khupacerya oweha mutankini mme wa maasi, khuwehaweha ntumuxa nothene. Owo khuttikittha owiitho wawe, ni owo aaniweha. Nto owo khuweha-tho, ni khoona etanki ile ya maasi. Owo khuwehaweha mapuro othene vastasawu, nto khupacerya weetta. Kwarta ohiya omweemexa, aaroomutthara.

<sup>165</sup> Owo khuvira vasulu va ntumuxa, khukhuruwela ephiro ekhaani, khurukunuwela moonoo woolopwana nto khuwela vantumuxani nikina naamukhaani, khuphiya vamuxaaxani mwaamukhaani wa matoro. Owo khuweha. Mulopwana mmosa mutokweene, khukhuma mpithela ni ekopo mmatatani mwawe, khukhuma khumpatikha. Khwira, “Mwan’aka, miyo kaahisuwela wira mwaamutthika. Kaaleeliwe wira mwaahookhwa, masi kaahisuwela wira mwaamutthika.” Vano mmiravo khwiisuwela. Oliyala wawe waahimuhiya. Owo aaniwerya wiisuwela wira aari pani. Owo aahisuwela wira ale yaari atithi awe.

<sup>166</sup> Oh, nakhotto a Vamwiikimanyo, mphiyenrye mukhalelo wa etuthuwelo ni mwaha wo oxuttihiwa vanci-ene, ituthuwelo sinci-ene sa muromolelo ni eyaaminelo, ni itthu sa molumwenkuni, muhinkhuruwelani okathi vakhani paahi nweha mBibiliani? Siiso murowaka weetteetta, ni munaiphwanya mmansinyu oosuwanyeihiwa mu Mmasuni, ntoko mulipa-ooaamini, nimoso wa mahiku awo. Nyuwo pooti muhimusuwelaka Owo. Nyuwo pooti wiisuwela, ntoko mwaana namahonona siiralyaawe, ni wiisuwela mmansinyu. Nyuwo pooti ophwanya osuwanyeihiwa wanyu Mmasuni a Muluku.

<sup>167</sup> Mutthu mmosa aairale, nihiku nlo, woohikhala khalayi, aairale, “Masi, Munna Branham, nkaniweheni hiyo atthu aPentekosite, ikereja xeeni sooreera hiyo nrinaahu. Vano, hiyo, hiyo nookhalana arumeyi aniixuttihiwaka.”

<sup>168</sup> Nwiriyane, mulopwana aamuthelaka muthiyana, owo khonlipa ni oreera wawe. Nnari. Owo onlipa ni ororomeleya wa natiri awe, nuulumo nawe. Owo khonlipana oreera wawe. Owo onlipana ororomeleya wawe.

<sup>169</sup> Ni ti siiso okathi onthelanaanyu ni Muluku, khamunlipa ni ekereja emosa yuulupale yooreera munweryaanyu oteka, masi mwa natiri Yesu Kristu omuhimyaawe, wira, “Miyo ka mmosaru nsana, olelo, ni mahiku othene.” Munnaamini yeeyo?

Nrowe nuurame muru okathi vakhani paahi.

<sup>170</sup> Kaatthuna kisuwele, ohiy'ula, mpaani mu vaavo atthu akilaanthe-aya, vaavo ari alopwana ni athiyana akhanle Oohimala, atthu anrowa wa Ehimalelo, ni munsuwela wira nihiku nimosi wala nikina muhaana okumana ni Muluku. Ni kinniikoha khama khamurina emumulelo eyo ekhaani ya oliyala, ni mwaatthuna . . . Munkhalakaanyu oosuwanyeihiwa ni etthu yoonanara, ni mwa—mwaatthuna weetteetta, ohiyu ula, ni oweha khama khivanweryaneya wiisuwanyeiha mwa Kristu Yesu? Munnitthuna ovenxa ntata, mwiire, “Mukivekelele, Munna Branham, miyo—miyo kintthuna kikhale oosuwanyeihiwa ntoko muKristu eekeekhai, mulipa-oowaamini eekeekhai.” Muluku ooreeriheni. Muluku ooreeriheni. Ooreeriheni nyuwo! Oh, ayo, mapuro othene. Apwiya Muluku yooreeriheni.

<sup>171</sup> Mutthu mmosa mpithela, aarowa wira, “Munna, vekeekhai kinnaamini wira eyo Ekeekhaii. Miyo kinnaamini, ntoko aKristu, hiyo khanihiyo aKristu ntoko awo yaakhalakaaya miyaakha sivinre.”

<sup>172</sup> Ankhi nyuwo atthu aPentekosite, okathi aximai anyu n'axitiithi yeemelakaaya mphironi nno, ni woopa ekoma ya khalayi. Ni ame anyu, moota awo yaarinaaya o . . . yaakhalakaaya ookhulumuwa, ni wiilipihani ni nyuwo anamwane axikhaani. Imaara sikina mwaahaana orowa muhirina ikuwo, ni itthu sothene sikina, masi atithi ni amai yaari oororomeleya wa Etthunelo, wira emukhalihe osulu Kristu.

<sup>173</sup> Nkawehani etthu nyuwo atthu aPentekosite mwiiralyaanyu. Iyaakha miloko mithanu sivinre, nyuwo mwaahikhuma mmuththenkesoni. Ti yeeyo enookhalihani aPentekosite, mwaahiivalaaniha ni mulipa-oohaamini. “Ni ntoko ekuluwe vamaroveni vaya, ni mwalapwa onththikela vamarapheyoni vawe,” muroothika khwiira yeeyo, khupaka enamuna emosaru ya evutukavutuka mukhumme-anyu. Exeeni yiiraneiyeyo? Oliyala wa muroohoni oroophuwa eriyari ya atthu. Murina iyaaminelo sanyu ni ipaphelo sanyu sa miromolelo vano, ni muhiiraana ni akina aya, muntthuna okhala ni akina aya. Muhaatthuniherya athiyana anyu omettha maihi aya, wiipintari. Nyuwo, munimwaatthuniherya awo wira itthu iya sothene, mutthuniheryaka itthu iya sothene mu—mukereja. Exeeni iyo? Oliyala wa muroohoni.

<sup>174</sup> Vano, naanaanoru, okathi Muluku onipaceryaawe oxekurya eriyari y'atthu, vano exeeni eniiraneya? Khimunwerya waakhela. Moone, munnikhala oowereiwa mwaha wa oliyala iwo, moone, etthu emosa ene paahi mutonko anyu wiiwa. Khimunuupuwela wira mwaahaana okhuruwa mwa eyaaminelo eyo minuutu vakhani paahi n'umukuxa Bibilia, ni woona enamuna muKristu orinaawe wiisuwanyeiha? “Ithooneryo iya sinimwaatthara ale anrowa waamini!”

175 Miteko, Petru iirale, “Murukunxe murima, khula mmosa a nyuwo, mpatisiwe ni Nsina na Yesu Kristu wira muleveleliwe itampi, nto munimwaakhela yoovaha ya Erooho Yoowaarya; tthiri natiri t’awinyu, ni an’inyu, n’ale ari ottaiwene, othene ale Apwiya Muluku ahu antthun’aya owiihana.” Awo yooleelani-ru wira kahi siiso, weeso apastore anyu aakhalana eretta yootepa ya oliyala wa muroohoni. Yaawo ene khanwerya ophwanyaneya yiisuwanyehaka ni Ekereja yeeyo; kahi mutthenkeso; Ekereja, Erutthu ya siiri ya Kristu.

176 Vano Erooho Yoowaarya eri vaava. Eyo eri vaava wira yiireke voolikana-ene etthu Owo aalaihenryaawe wira. Vano muryeene vaava ni muru anyu wowuurama, mukhale nvekelaka paahi. Muhiye Erooho Yoowaarya elavule, Eneene. Nto moone khama ola . . . Khula mutthu onnisuwela eyo, natiri, ole okhanle a nihiku nenla. Vano nyuwo murina yoothuna, ohiy’ula, nyuwo, anci-ene a nyuwo moovenxa matata. Muhinatthi wira yeeyo . . .

177 Kaatthuna kisuwele, niryene vaava ni vekeekhai naavekelele aretta, kinniikoha khama munoowerya wiihuluxa ohaamini iwo, muromolelo ole, eyaaminelo ele enooleelani wira itthu iya khasihiyo siiso, ole aarowa wooleelani wira Eyo ti ya xetwani. Awo yaairaka yeeyo, “Awo khankhalakhala aleveleliwaka, olumwenku ula nnakhala olumwenku onrwa.” Ankhi Ela yakhala Ekeekhai? Muupuwele paahi, ankhi Iyo yakhala, vano muri vayi? Moone, khamurina yo olavula mwiituperyaka; mwaamini paahi mmurimani mwanyu. Ni aakhala atthu va anaamini yeeyo. Kinnikhala vaava, mahiku maili ookiserya, kiwanaka vathi va etthu, paahi, wulu, kiivarelelaka ni kilumaka nlumi naka, wira kihihimye.

178 Ni muupuwele, mpatthani, eyo eri eriyari ya nyuwo ni Muluku. Ankhi yakhala yoovonyeya, ni nyuwo muupuwelaka yeeyo? Nyuwo moosuwela eniiraneya, khimunkhalakhala muleveleliwaka mwaha wa yeeyo. Oliyala wa muroohoni, munoorowa mulukamaka mookhwaani mwanyu Woohimala, ohaamini. “Ole ohinaamini oomala olamuliwa!”

179 Vano nvekelele iretta sanyu, mwiire, “Pwiya Yesu, Nyuwo moohimya. Miyo . . .”

Siiso akhanleene aletto va, ahinatoko okhala vaava khalayi.

180 Yesu aahihimya, “Ntoko saary’aya,” Kinrowa okuxa Yoolempwa emosa, “mahiku a Lothi,” okathi Muluku aaisoonihenryaawe mw’erutthuni y’ethayi; nto atthu, Abrahamu, nikhuru noothanliwa, nikhuru noowiihaneliwa okhuma. Vano nsina na Abramamu naahirukunxiwa khukhala Abrahamu, nuumala owo aahoona Masu oowiipaka erutthu, ni Eyo yaahilamula miyuupuwelo saari mmurimani mwa Saara.

181 Nto okathi oruulyaaya Osuulu w’Omwene w’Abrahamu, ti yeeyo Owo aairalyaawe, vano awo khumwiihana Owo “xetwani.”

<sup>182</sup> Owo khwira, “Vano Erooho Yoowaarya yarwa vale, enimwiira etthu emosaru.” Khwira, “Vano wookhala oleveleliwa mwaakiitthanaka yeeyo Miyo, masi, mwalavula vale nveehaka Erooho Yoowaarya, khuuvo oleveleliwa.”

<sup>183</sup> Vano Owo, mwa Owerya Wawe, orwe varyari va muthukuman’ola w’atthu, khula nipuro muryaanyu, ni ni olamula Wawe wa muroohoni ooniheryaka wira Owo ti Masu. Wira yakhala atthu va anwereiwa ni oliyala, wira awo khani. . . kharrowa okhalana etthyaweledo, ohinatthi wiiriwa wiihana nno waltaari.

<sup>184</sup> Apwiya Muluku enikhaliherye. Vano ni muru anyu wowuurama, ni nttittimiho nivekelaka.

<sup>185</sup> Moone, ookhala muhano mmosa okilaanthe va ohoolo waka. Owo oovenxa matata awe wiitho wawe. Owo oninwereya muthana. Nave-tho owo orina eyuukhuwelo. Ookhalana eretta ya mmirimani. Ni okilaanthe va ohoolo waka vano. Ni wira osuwele, owo kahi a elapo yeela. Owo t’a epooma emosa eniihaniwa Macon. Ayo. Nyuwo munnaamini wira Muluku onniwerya okileela nyuwo mw’ani? Nyuwo mwa Muhano Ayers. Yaari ekeekhai, nvenxe ntata. Miyo ka mmalapo wa nyuwo. Eyo ekeekhai, kehiyo? Vano eretta anyu yoomala. Yesu Kristu; nyuwo mookwannya nlaya Nawe. Owo ohookhalihani mukumi. Vano mwaamini paahi.

<sup>186</sup> Ookhala mulopwana mmosa okilaanthe ottuli w’empa. Owo omphavela opatiiso wa Erooho Yoowaarya. Owo onthuna opatiiso ni Erooho. Owo ori va ohoolo waka. Owo kahiyo a wenno, nave. Owo t’a oCarolina, Charlotte. Lepoe ti nsina nawe. Mwaamini ni murim’anyu wothene, nto Muluku onimoosarihani ni Erooho Yoowaarya, mu—munn’aka, mwaaminiru.

<sup>187</sup> Va, moonoo aka woolopwana, va ori mu—mulopwana mmosa ni mwaar’awe akilaathanse ohoolo waka wene va. Awo anaitthoko anli atokweene, moonoo aka woolopwana. Muhan’owo onihaaxeya ni eretta ya nrupo nuulupale. Aiy’awe arina eretta ya murima. Awo kahiyo a wenno. Awo anikhuma oTennessee. Mwenye ni Muhano Thomas, mwaaminiru ni murima anyu wothene, nvenxe matata munoowerya waakhela ovonihiwa wanyu. Yesu Kristu onnoovonihani. Vekeekhai ti yeeyo Owo aahimaly’awe wira. Masi nkinatoko owoona atthu ala kookhalaru.

Oliyala wa muroohoni!

<sup>188</sup> Yesu ohimnye wira, “Miteko Miyo sinvaraaka nave-tho nyuwo munoovara. Okathi vakhani, nto olumwenku khunrowa okoona-tho Miyo; nave nyuwo munookoona, maana Miyo,” eporonome ya mutthu, “kinookhala ni nyuwo, hata mwa nyuwo, mpakha omala olumwenku.” “Yesu Kristu mmosaru nsana, olelo, ni mahiku othene.”

189 Vano, w'alopwana n'athiyana mu, murina etthu enoohaaxani, tthiri muhinweryaanyu woona moota... Nyuwo, munnitthuna waamini, masi khamunwerya okela mwa yeeyo tu, ni mwaatthuna wira nvekeleliwe, muntthuna omukupali Yoowo muryeene Ohoolo Wawe, munnitthuna orwa weemela vaava va vakhiviru ni miyo, mukitthuniherye woovekelelani ni owiixaatheryani matata. Mwarwaaru vaava va ohoolo nno, nyuwo munihaaxeya siiso, ni oliyala wa muroohoni, ni mwaatthuna wira nvekeleliwe, wira nvuluxiwe yeeyo. Mwaahikhale—mwaahikhale mulipa-oowaamini, masi munatthuna ovekeleliwa, murwe nno mweemele. Muluku ooreeriheni, mmiravo. Mutthu mukina tho onoorwa? Muluku ooreeriheni, muhano. Rwaakani. Muluku ooreeriheni, mwamuthiyana. Mutthu mukina tho onrwa? Murwe, mweemele va, naanaano va.

190 Oliyala wa muroohoni, nkinthuna ohaaxiwa ni yeeyo. Muluku ahitthuniherye. Mukihiye—mukihiye kikhwe ekhwelo ya e—etthu p'itthu, masi kihikhwe ekhwelo eyo ntoko mulipa-ooaamini.

191 Murwe, mmukupali Yoowo vano. Khamunthuna wira? Murwe, ni mukhuruwe mpithela, apatthani. Mavaloo vakhani paahi vathi va, ni eyo pooti ohimya evirikanelo ya okhwa ni Ekumi, wa nyuwo.

192 Nkawehani, nkinwerya omukhanyererya Kristu wira etthu. Kristu khorina wira hat'etthu woohikhala etthu emosa: Owo ohaana omaliherya Masu Awe. Owo aahaana wira eyo wira akhale Kristu, wira akhale Muluku. Owo aahaana omaliherya Masu Awe.

193 Vano muupuwele, mwaahikhale oolipa ni musuwelelo anyu, muhinrweelani naanaano va. Vakhala wira muniira mpantta wa murumolelo paahi, vakhala wira mwa musuulu a Pentekosite, Muluku khorina axisuulu. Owo orina aana alopwana n'athiyana, masi kahi axisuulu alopwana ni axisuulu athiyana. Munnona? Muluku khorina eyo. Owo orina aana alopwana n'athiyana paahi, ni nyuwo moosuwela wira khamuhiyo.

194 Khino nyuwo moolavula ilavulelo, khino nyuwo muhiina, khino muhiira sothene *iya*. Eyo ti yooreera. Miyo nkirina etthu ya nthowa ni yeeyo. Masi nyuwo nlelo mwakhalana oliyala iwo wa muroohoni, mukhuruwe, murwe va ni mweemele va. Nivekele mwaha wa yeeyo. Munihiyani? Mempuru a ekereja, paahi—mempuru onihimmwa paahi a ekereja, muhinvirelani ohoolo nno ni huluxa yeeyo naanaano va?

195 Nkinthuna okhuma oBirmingham nno, ni osuwela wira nihiku nimoso, Olamuliwa orwiye-ene, ni kinakhala oo weemela ohoolo wanyu... Muupuwele, kinoorowa okumana-tho ni nyuwo. Kaahitthikele-ru okumani ni nyuwo wenna, kinoorowa

okumana ni nyuwo Wolamuliwani ni kihaana waakhula mwaha wa etthu kihimyyaaka ohiy'ula.

<sup>196</sup> Vano nwiriyane. Murukunxe murima, apathani! Murukunxe murima, mukhume vo. Mukhume vo. Murwe naanaano va.

<sup>197</sup> Eyo yaahaana omwiiraha khula muthiyana oomettha maihi mulaponi mu, ahiiso nipuro nla, orwa nno naanaano va. Eyo ekeekhahi volikana. Wira, wira khamurina mahala oophiyerya wira tthiri muhimye, "Miyo—miyo—miyo—miyo kinnitthuna, kintthuna kihiye maihi aka wunnuwa, Munna Branham." Yaahaana . . . "Miyo kihaana . . . Ahe, miyo nkirina mahala wira kiire."

Vano, nyuwo muniira, "Eyo ehaana naata n'iyoy?"

<sup>198</sup> Nno woohikhala khalayi, mulaleyi mmosa muulupale eekeekhai aahikirweela, khwira, "Kintthuna kiwiixaatheryeni matata, Munna Branham." Khwira, "Atthu othene anootthokelelani ntoko profeta."

Miyo khwira, "Miyo nkinahimyeke wira ka profeta."

<sup>199</sup> Owo khwira, "Masi atthu anootthokelelani siiso. Nyuwo okathi wothene munaakhera athiyana awo, mwaha wo waawaraka akaputtula," ni—ni, oh, mulopwana mmosa muPentekosite. Ni khwira, "Mwaha wo waawaraka akaputtula, n'umettha maihi aya, n'itthu siiso." Khwira, "Owo kuhiyo mwah'anyu."

Miyo khwira, "Mwaha aka t'uvi nto?"

<sup>200</sup> Nto owo khwira, "Atthu ale, muhiniwiixuttihieryani athiyana ale moota wo okhala, okhalana soovaha suulupale sa erooho, ni waakhaliherya atthu, ohiya ophavela o . . ." Khwira, "Awo annoophentani. Ele munaaleelaanyu, awo anoowaaminini." Khwira, "Xeeni ohaahimeeryaka moota wo ophwanya soovaha suulupale ni waakhaliherya atthu, ohiya kweekwe waapwapwela?"

<sup>201</sup> Miyo khwira, "Kinwerya sayi owiixuttiha alxepa awo ahitonko nakhala omwiixutta ABC aya?" Munnona? Munnona?

<sup>202</sup> Muhaana opacerya vathi, murukunxe murima ahiiso munoopwetey! Vano mwiire entthunaanyu, murukunxe murima ahiiso munoopwetey! Yesu Kristu Yoowo ohiisuwanyeiha voomalela va, ohiyu p'uhiyu. Ni ola p'uhiyu hiyo ninvahereryaahu woopowa nno. Mavalovakhani paahi ohoolo nno, ni kookhalana okathi munci-ene w'olipelela.

<sup>203</sup> Muupuwele, Birmingham, ephome anyu khekhanle mwa miyo. Miyo ka oohittheka. Ni nyuwo tthiri mwakhalana Erooho Yoowaarya, mookhalana oreeriwa w'orwa vano. Ni nyuwo mwaahaawaka ni enamuna emosa ya onamukerejani yoophwanyinheni oliyala wa muroohoni, muhinrweela-ni? Yesu ti openuwa. Khamuntthuna orwa?

204 Vano atthu kamosa-kamosa aakhuma mpithela. Miyo kaamulipelela koone khama, yaamukhuma ahiiso jaarwa waltaari. Ala nno, murwe nvire nno murukurerye. Ti yeeyo. Nyuwo muri va, murwe mweemele munrukureryaka altaari, mwiire, “Miyo yookimala ela.” Ayo, awo jaarwa ekhuruwaka, axithiyana anli. Ti yoooreera.

205 Rwaakani mulukame va. Mavallo vakhani paahi okhuma vaavo. Nto mavallo awo pooti ohimya evirikanelo.

206 Vano, nkawehani, kintthuna kookoheni etthu. Ankhi Owo arwa vale ohiy’ula? “Oh,” eniiriwa, “Owo khonrwa.” Nkisuwenle khama Owo onimoorwa wala nnari. Ela ethoonyeryo yookiserya. Muupuwele, SIISO ANIHIMYA T’APWIYA! Nyuwo mootoko okiwa miyo ohimya yeeyo khuhikhala ekeekhai? Nyuwo munoono ethoonyeryo anyu yookiserya. Eyo ti Yoolempwa. Nyuwo muhoona ethoonyeryo anyu yookiserya, Pentekosite. Muhiitapanye vano ni ele Owo omulaihenryaawe Isarayeli nuumala Okuxiwa; eyo khamuhiyo nyuwo. Eniira emanle ni nyuwo, okathi uwo. Munnona? Olelo ti nihiku nanyu. Olelo ti ethoonyeryo anyu. Olelo p’ukathi anyu. Muhikhootte Eyo. Muhiire. Vanreerela murwe. Munnaamini wira ka murumeyi a Muluku? Muupuwele.

207 Birmingham, nkinatoko waasuwela atthu oophenteyaxa. Nyuwo mw’atthu oophenteyaxa kaatthunne aka waasuwela kookhalaru, masi munnitthuna muhakalaliho. Munookhwa. Onoophwanyani oliyala wa muroohoni. Munookhwa. Muhiire. Mukhalihe ekumi yeeyo murinaanyu. Nvenxe-tho, mwaakuvaka, Yesu ohinatthi orwa.

208 Vaareera, okathi awo a . . . Mukhaleke murwaaka. Mwaahiye ekhale erwaasaka paahi mpakha naaphwanye othene, Apwiya aniwiihanaaya, ohoolo nno. Murwe naanaano.

209 Mwiihuluxe oliyala iwo. Meetiku muulupale ori vaava naanaano va wira ovonihe yeeyo, okumihe mwa nyuwo. Owo ohooniherya wira Owo ori vaava. Akavi anrowa osuwela yeeyo, avenxaka ntata, yiiraka, “Vekeekhai kinnaamini; wira Owo aahimye wira aamwiira yeela”? Munnona? Vano Owo ori vaava. Munnona? Munnona? Munnaamini.

210 Ni akavi ansuwela wira kinooleelani ekeekhai, wira munookhwa ni onthuneya muhakalaliho wa nyuwo? Munnona? Eyo ekeekhaii.

211 Nyuwo mwa atthu ooreera murima. Khivanweryaneya waaphwanyanya ooreeraxa murima. Khasivo mirima sooreerexa simmana, ovikana iya vathi va ikamisa iya sa Okuusini nno. Ti yeeyo, atthu eekeekhai! Masi, mw’atthu, vanreerela nvenye, naanaanoru! Okathi muhinuupuwelelaanyu, pooti wiiraneya. Pooti ohiraneya; miyo nkisuwenle.

212 Masi, muupuwele, munaakhela olopoliwa wanyu wookiserya, tivo muthyawe murineene okathi w’otthyawa.

Murwe naanaano va. Awo arwaaka, kinrowa okhala kilipelelaka, okhala wira pooti...Munepa mmosa orina ehisapo ya olumwenku ikonto muloko. Ni okathi atthu ankhalaaya ookupalihwa... .

<sup>213</sup> Kaatthuna koone ela emwareyaka ekhale muhakalaliho muulupale onrowa okeliha khula ekereja nno; mwaihuluxaru ivirikanelo sanyu ni okumiha erala eyo yothene, ni waakhela Erooho Yoowaarya. Nyuwo muhimmye wira munnaamini Yeeyo. Nyuwo muhimmye wira munaamini Yeeyo, ni, Eyo jaarwaaka wiisuwanyeiha Mmansaya, vano nyuwo munoovalaana. Xeeni ohiiraanihaka mirima sahu ni Masu a Muluku ni waamini Ekeekhai? Ti yeeyo. Munoothikela mukhwaaka paahi, mukhwaaka, vano munoorowa mpakha Lawotiseya. Vekeekhai yeeyo Owo aahimaly'awe, Enrowa okhala siiso. Muhinrweelani naanaano va? Vano ti nihiku. Vano p'ukathi wookupaleya. Nwehe etthu Erooho Yoowaarya enrowaaya wira.

<sup>214</sup> Vano miyo kinaatthuna arumeyi othene va, anicaliwa n'atthu ala, arwe avekele ni miyo, nave. Murwe nno, arumeyi othene anicaliwa n'atthu ala. Murwe, nvire va, etthukuliwe ephiro eriyari y'atthu, murumeyi wala namuteko ootaphuwa, namuteko oosuwela ootaphuwa, muthiyana onthhuna weemela n'athiyana ala vano. Miyo kinrowa waamini, ni murim'aka wothene, wira Erooho Yoowaarya enoorowa orwa nipuro nla vaava naanaano ni wiisuwanyeiha Eneene eriyari y'atthu ala.

<sup>215</sup> Vano mukihye kaaleeliherye atthu ala va, toko. Vano, apatthani, khula etthu mukhalenlyaanyu va, Owo onnisuwela. Ni kinoowerya owooniheryani, Eyo enimookuxani, mmosa-mmosa, wooruuhani nno vaplataforma va, ni khenrowa okhala etthu emosa Owo ohinrowaawe osuweliha. Vano eyo ennikhalaka okhuma kaaryaaka mwammiravo. Yoovaha eyo khenihovereya. Masi yookoha t'ila, munniwerya waakhela? Munnaamini yeeyo? Vano Owo ori vaava. Ahe, vakhala wira Owo ori vaava, nto eri etthu emosa paahi, Owo onnimaliherya Masu Awe. Vano mwaamini paahi wira munimwaakhela, ni mukupali, ni nvenye mwiire, "Pwiya Muluku, miyo kiri va wira kaakhele yeeyo," ni mukhale vaavo paahi mpakha wiiraneya.

<sup>216</sup> Ntoko Buddy Robinson saahimyaawe emaara emosa, mmatta mwa nakhuwo. Owo iirale, "Pwiya, Nyuwo mwaahikivahe Erooho Yoowaarya, mwaatthikaka munoophwanya nikuttha na makhuva vaava." Owo aahimya ni exariya. Ni khamunrowa ophwanya etthu wa Muluku mpakha mukhale oohiroromela voophiyerya.

<sup>217</sup> Vano, mooweha ohepha w'olelo, mooweha olelo etthu eniiraahu? Hiyo, vekeekhai, hiyo nookhalana Muluku oophiyerya wa hiyo mpakha vanirwaahu vaplataforma, niniira, "Ayo, khino vanreerela kirowe ohoolo." Vano ola musuwelelo wa mulaponi mothene. "Ayo, vanreerela kivire keemele." Eniiriwa,



“Ahe, ahe, nkisuwente. Miyo kiri va, moone.” Hmmm! Mukhalelo xeeni! Khuuvo ovarela wa mooro. Khiivo ehakalalelo. Khiivo “nikele mwa Yeeyo!” Ni, ntoko namalaleya ehapari yooreera, eyo ennikipwetexa paahi owoona atthu a Muluku mwa mukhalelo yoowo. Nihaana okhalana mooro ovarelaka.

<sup>218</sup> Masi, moone, exeeni iyo? Tthiri ti yeeyo koohimenryaakani. Wiisuupulula 3, “Nyuwo mwa ookuttihiwa. Ni,” Owo ohimye wira, “okhala wira nyuwo mwa ookuttihiwa, vano Miyo kinrowa woorapheyani mwaano mwAka.” Eyo ekeekhai? Ti yeeyo Owo ohimyaawe. Nto, vakhala wira Owo oohimya, ti yeeyo Owo onrowaawe wira. Tivo nihikhaleke nikhuru nenlo.

<sup>219</sup> Nyuwo muri va, oothoiwa. Nrowe naakhele Yeeyo, ahiiso okhwa, vaava. Ti yeeyo. Nrowe naakhele Yeeyo, ahiiso nikhwe.

<sup>220</sup> Vano, munn’aka oophentiwa mulopwana, muthiyana, kaawerya okhuruwa ni wookhaliheryani wira etthu, vekeekhai kaamwiira. Vano, ni yoovaha, kinoowerya wooleelani etthu mukhalenlyaanyu va. Kinoowerya wooleelani ele ekhanle, ni Erooho Yoowaarya, ni Erooho ya Muluku, woohimeeryani etthu murwenlyaanyu, etthu mwiiralyaanyu, ele enrowa okhala y’ohoolo, wala etthu siiso; masi eyo khemmalaha mwaha. Muhaana okupali Yeela, yeenyu. Muhaana okhala nyuwo!

<sup>221</sup> Vano moolikana? Nvenxe ntata, mwiire, “Miyo koolikana. Koolikanana okhwa vaava va.” Vano muhiire voohikhala wira munihimya vaxariya. “Koolikanana okhwa vaava, ahiiso waakhela etthu entthunaaka wa Muluku.” Amen. Tthiri moolikanana?

<sup>222</sup> Vano muthukumano ovenye, mapuro othene. Vano vamosa, vamosa, nrowe niiraane vamosa. Nivekele. Ni nrowe paahi. . . Nyuwo arumeyi vano murwe wa atthu ala va, khula mmosa, ni nyuwo munthoonerya matata a Kristu vano.


<sup>223</sup> Nyuwo munthuna Erooho Yoowaarya, nyuwo munthuna musuwelelo yoowo, kahi moonelo wo wuukhuwa; munthuna Erooho Yoowaarya, Ekumi, eropo y’Ekumi muhina mwanyu. Ni munthuna mwiikumihe oliyala iwo onookhalihani—muhinweryaanyu wiisuwanyeiha; nyuwo khamunsuwela vatthu mweemenly’anyu; nyuwo khamunsuwela etthu nyuwo mukhanlyaanyu; nrowe niihuluxe eyo naanaano va! Wookhala Oyariwa vasya va wa nyuwo, Oyariwa vasya w’ekeekhai, wooloka.

<sup>224</sup> Vano nrowe niwiixatherye matata ahu atthu ala. Nrowe, khula mmosa, nivenxe matata ni nivekele ni mwiiwanano mmosa.

<sup>225</sup> Tithi a Wirimu, mwa Nsina na Pwiya Yesu, munivahe, Pwiya, wira mwa Nsina na Yesu Kristu, Erooho Yoowaarya erwe ohiy’ula, ohiy’ula wa Esaapatu, ntoko Erooho Yoowaarya yaakhurunwaaya ntoko epheyo enoopa n’ikuru. Wira atthu ala apatisiwe mwa Erooho Yoowaarya. Mooro ni Owerya wa Muluku

ohaahiye. Vakhala wira awo anookhala vaava mpakha voosiisu, ekhale, ekhale mpakha Erooho Yoowaarya orwa.

<sup>226</sup> Owo ti muupuwelo! Ti yeeyo! Eyo eri vo. Eyo ti Erooho Yoowaarya enoorwa. (Miyokoophwanyanya. Miyokoosuwela eyo.)

Eyo ti yothene. Mwaamini Yeeyo vano! Mukupali Yeeyo! Musarihiwe iparakha Saya. 

*OLiyALA WA MURooHONI* EMK64-0411  
(Spiritual Amnesia)

Mutthak'ola wa Munna William Marrion Branham, opaceryawene olaleeriwe ni Enkelesi Esaapatu ohiyu, mahiku yeettaka 11 mweeri wAbril, 1964, oNational Guard Armory oBirmingham, Alabama, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumihiriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)